

**MARA EVANGELICAL CHURCH**

**MISSION & EVANGELISM DEPARTMENT**



Estd. 1907

**2023 SEPTEMBER APAHRANA CHÂBU**

**BIEPIPA:  
MISSION CHAKAONA CHÂTA BIEHRAI PACHUNA**

Rev. Samuel Lathai  
(Mission Director)

**Mara Evangelical Church  
Mission & Evangelism Department  
Hqrs., Sabawngpi**

*Copy Right @ 2023 by*

**MISSION & EVANGELISM DEPARTMENT**

*Format & Design*

San Lwin

*Author*

Rev. Samuel Lathai

*Copy: 700*

**20 July 2023**

*Printing Press*

**MEC Office, Sabawngpi**

*Published by*

**Mission & Evangelism Department**

**Headquarter, Sabawngpi**

## ACHHÔHBIE TLUANA

<b>NB.</b>	<b>ACHHÔHBIE</b>	<b>CHÂHNA THO</b>
1	Khokheina Bie .....	i
2	Biehmiapa .....	ii-iii
3	Mission Tahpa Cha .....	1-3
4	Mission Pizie .....	4-6
5	Mission Pahlykawhna .....	7-8
6	Mission Vyuhtuapa .....	9-10
7	Mission Bietâpa .....	11-13
8	Mission Su .....	14-17
9	Mission Chhâpa .....	18-20
10	Mission Thatlôna .....	21-24
11	Mission Châtaw .....	25-27
12	Mission Achhuahpa .....	28-30
13	Biehraï Parohpa Mission Cha .....	31-33
14	Hmotaopazy châta Khazohpa Hmochhuahpa .....	34-36
15	Chyhspâ Taona liata Khazohpa Hmochhuahpa .....	37-40
16	Pachhana châta Khazohpa Hmochhuahpa .....	41-43
17	Khazohpa cha Chyhspâ to Misawnari a châ .....	44-47
18	Khazohpa Phopi Paduana Mission .....	48-50
19	Khazohpa Mission Bietâhpazy .....	51-55
20	Hrosohpazy Mission Bietâpa .....	56-59
21	Hrosoh Laipazy Mission Bietâpa .....	60-62
22	Hrosoh Chyhpazy Mission Bietâpa .....	63-65
23	Zisu Krista Mission Bietâpa .....	66-68
24	Zisu Krista Mission Liamarihpa .....	69-71
25	Dyhchhiepazy lâta Thâtihpa Chhona .....	72-75
26	Zisu Krista Raipie Rônahpa .....	76-79
27	Sypnotic Thâtihpa Mission .....	80-83
28	Awnanopa Hmiatuapazy Mission Chakaona .....	84-86
29	Lyuchâpa Pawla Mission Bietâpa .....	87-89
30	Lyuchâpa Zami Mission Bietâpa .....	90-92
31	Apostol Zawhana Mission Bietâpa .....	93-95
32	Mara Awnanopa Mission Chakaona .....	96-100

## **KHOKHEINA BIE**

MEC Awnanopa ta Thlahpa lâ liata tha eimâ lana chaipa thla, September apahrana ahmâna châta Chhithana Bu pha ngâsâpa Rev. S. Lathai (Mission Director) ta a vaw pachhuapanoh theipa vâta ano chô liata a vaw ly kaw pi ta, Awnanopa Assembly ta nata a eih via pachai ta Mission Department tawh alyna bie eima vaw hlâ hmeiseih. Âdaihti nata rai patlypa ta he Châbu a vaw ropa he Awnanopa eima Local chyu liata eimâ ngiapâna nata chakaona liata tha miah patlô sala, Awnanopa hawti, machâ Thlahpa lâ liata miah pahra sala, he Châbu chhôh liata Khazohpa bie khokheina heta eima Awnanopa châta byhnâ vaw châ mawh sy! Amen.

Krista liata,



Rev. A. Rakhai

(Excutive Secretary, Mission)

## **BIEHMIAPA**

2021 MEC Assembly Executive Committee, Sabawngpi ta keima phahnai lei chaipa chhao he na vaw deichhy pha ngâsâ ta 2023 September Apahrana châbu a patohpatia hra awpa ta eina vaw rao thlâh hâpa cha pachâ nahta ei ly ngai tarawpa ta ei chhorupa lâta châ ei vaw ngiarohpâ ngâsâ.

ABeipa baona angâpachhâpa ta thlahzy a vaw chhâ nahta ei palôhrupa liata a vaw puapa cha B.Th ei chu nota kôchhâna liata degree lana awpa châta ‘Research paper’ miah ama parohsa nota bie tlâhpipa ei vaw tlypa “The Biblical Basis for Mission” tahpa “Mission châta Biehrai bie thabypazy” he Apahrana bie chupa châta sermon chyupa ta roh pathieh awpa he a vaw châ. Chavâta he bietlâhpipa tlai he avykhei nahta he liata ei vaw tawh thlâh hâpa a vaw châ.

Na khokheituhpa nata thlahchhâ na bao lymâtuha Awnanopa nôpawzy hnohta nata eima EMM office chhôkhazy lâta chhao alyna reitiah leipa bie ei cha hlâ hmeiseih ei! Tha na patlôtuha, hrihsiana na pietuhpa ABeipa Khazohpa lâta aly ngaita nata a moh rônahpa reithai lei ta y thei vana. ABeipa moh he tlyzaw ta reithaipa ta y mawh sy! Amen.

He châbu nawraih kawpa liana heta a chhôhbie he bo 3 lâta pachhaihpa a châ. Bo 1-na he “Mission yzie” tahpa châ ta, a chu awpa bietlâh chyhpa mia (10) ta pachhaih pachhuahpa a châ. Bo 2-na he “Biehrai Parohpa Mission” tahpa châ ta, a chu awpa bietlâh chyhpa mia (10) a hnei hra. Bo 3-na he “Biehrai Thiehpa Mission” tahpa ta bietlâh chyhpa mia (10) ta pachhaih

pachhuhpa a châ hra. Bietlâh chyhpa zydua ta mia (30) he Apahrana noh 30 châta a châ aw.

Areituhpa nata a chutuhpa Awnanopa sahlaozy ngiapâna palôhrupa liata Biehrâi Pathaihpa he Missionary châbu rônahpa a châna hmeiseihpa pahnopa ta mission thapasana nata veina châta dikha ta chha thatlo viana a châ hra bao khiah ta cha tahpa he ei thlahchhâna a châ.

Areituhpa nata achutuhpa Awnanopa mopathaihpa nama zydua chô liata ABeipa byhnâ thiehpa vaw tlô mawh sy!

Nama deichhupa,



Rev. Samuel Lathai  
Mission Director

<b>1 SEPTEMBER 2023</b> <b>FRIDAY</b>
------------------------------------------

## MISSION TAHPA CHA

*Chyhsazy hrona pachha awpa ta Khazohpa ta nama hmia lâta eina vaw 'tuapa' a châ hi (Athaona 45:5).*

Biehrai Pathaihpa liata mission tahpa hawrawh he ahnohnia kawpa ta a y leipa chhao ta Biehrai pôhpalôhpa tlai he mission châbu ta a châ. Mission tahpa hawrawh he Mongyuh hawrawh châ ta, Latin reih “missus’ tahpa tawhta a vya a châ. A yzie cha “Tuapa pakha” tahna a châ.

Khazohpa Biehrai achuna kao lâ tawhta cha mission tahpa he “Thâtihpha chho” tahna tla a châ. H. Johannes ta cha mission tahpa cha “Tlâh-awhkheina, akaona, chakaona zy he a châ” tahpa ta a chhopasia. Richard Niebuhr ta cha mission tahpa cha “Eima yna pâhchhō mia 4 khô lâta eima hmotao raihria zydua he mission a châ” tahpa ta a chhopasia. Areikhohna cha Awnanopa ta ano Awnanopa member khôtholâ ta a ypa chyhsa sahlaozy châta a raihria chakaona zydua he mission a châ tahna a châ.

John Stott ta cha mission tahpa cha “Khazohpa ta Awnanopa he khizaw lâta atuana raihria zydua he a châ” a tah. Khazohpa ta khizaw chyhsa zydua Ano ama pahno thei nawpa ta Izarei he khizaw liata atuah. Izarei sawzy ta Khazohpa lâ amâ heih thei nawpa ta hrosohpazy atuah heih ei. Khazohpa ta a Sawchapaw matlupa Zisu he khizaw liata a vaw tuah. A Sawchapaw matlupa ta apachupazy he khizaw liata atuah heih ei. Amo thlah palôh awpa nata thapatlô awpa ta a Thlahpa

Pathaihpa he avaw tuah heih. Cha tuana nata tuapa raihria zydua cha mission tahpa a châ.

Krizyhpapa Awnanopa ta mission tahpa hawrawh areichakhinazie zy cha a ry lia hawhta a châ.

1. Atlypa su miakhâ lâta misawnari tuana he mission a châ.
2. Misawnari ta a raihria awpa maohphaona zydua he mission a châ.
3. Misawnari yna râh nata raihriana su-zy he mission a châ.
4. Misawnari atuahpa department he mission a châ (EM Department).
5. Krizyhpapa leina khizaw he mission a châ.
6. Ano kuphei tata aduah thei mâh leipa Awnanopa he mission a châ.
7. Krizyhpapa ngiapâna palaiseihsana su he mission a châ.

Chavâta mission tahpa hawrawh he cha achhopasiazie hluhpi a ypa hawh hrata a raihria chhao kao hluhpi ta a y hrappa a châ. Apachhoh chaina ta eima chhopasia khihta cha chyhsa ta anosasyh pha nawpa châta a châ leipa mohropa phahnai nawpa ta a hmotao raihriapa zydua he mission ta a châ. Cha tlai cha Khazohpa hmochhuahpa mission raihria rônah ngaitapa cha a châ.



**REIPAHMAOHNA**

- 1) Mission tahpa yzie he nâma pahnonazie nata âlyu/lyulei reipasiasia chyu awpa
- 2) Mission tahpa reikah he nama Local Church Awnanopa sahlao chhoh liata ama pahâh kheipa reikah ta ma âlâ? Ai lyu chhihpa reikah ta ma âlâ tly?

<b>2 SEPTEMBER 2023</b> <b>SATURDAY</b>
--------------------------------------------

## MISSION PIZIE

*Khizaw thailei pachâsa nawpa ta Khazohpa ta a Sawchapawpa khizaw liata atuapa châ vei, khizaw Ano vâta pachhapa ta a y thei nawpa ta a tuapa tlaô a châ (Zhn. 3:17).*

Hmo to he ahnawh, athari, athyutôna ahnei saipa a châ. Cha hawna hra chata mission chhao he a thyutôna hnawh ahnei hrapa a châ. Cha cha Khazohpa Ano tlai he mission châ ta, misawnari châ ta, mission pathaotuhpa châ ta, “Mission hnawh” ta a châ. Khazohpa he mission raihria hnawh châ ta, mission raihria châ ta, tuatuhpa a châ.

Khazohpa Ano tlai he hrosohpazy a tuatuhpa kha a châ. Khazohpa Ano tlai he a Sawchapawpa Zisu Krista a tuatuhpa a châ. Khazohpa Ano tlai he a Thlahpa Pathaihpâ a tuatuhpa a châ. Khazohpa Ano tlai he a chyhsazy a tuatuhpa a châ.

Khazohpa palôhphaozie lâ tawhta eima sai khihta cha Khazohpa ta a raihria hmotaopa hmo maih he mission ta a châ. Cha raihria zydua cha Khazohpa Ano cheingei ta a pathaopa a châpa vâta mission raihria he cha Khazohpa nahta pathao khohpa ta, Khazohpa nahta a hrialâh lymâ awpa raihria ta a châ.

Khazohpa ta cha mission raihria cha Ano kakuapa, a kuzô ta ataopa, a kyhpachâ ngaitapa, a chyhsazy nata hmaohkha tata hrialâh awpa ta amo cha aw ei ta, a tuah ei.

1. Khazohpa ta Ano nata raihrialâh awpa ta a hrosohpazy cha aw ta, a tuah ei (Zer. 7:25). Hrosohpazy cha Khazohpa ta a rai hrialâhpa ama châpa vâta ama chhâh â chhâh lymâ ei. Ama raihria chaipa cha chyhsazy Khazohpa ama paviasaina tawhta pakuasa heih awpa ta zikyurâna raihria a châ.
2. Khazohpa Ano tlaita Ano nata mission rai hrialâh awpa ta a Sawchapaw matlupa Zisu Krista atuah (Lk. 4:18). Sawchapaw matlupa cha Khazohpa ta ei chakaotuhpa, ei duakheipa, ei tlypa, ei palôhrupa ta aly ngaitapa, a chô liata ei Thlahpa ei sopa a tah (Isai 42:1). Sawchapaw matlupa Ano tlai chhao ta “Na tuatuhpa khohpa taopa nata a raihria paloh awpa he ei pati a châ a tah (Zhn. 4:34). Zisu ta Paw Khazohpa rai hrialâhpa he a pahâhsa ngaitapa a châ. Mission raihria he Awnanopa ta apahâhsa chaipa a châ awpa a châ.
3. Khazohpa ta Ano nata rai hrialâh awpa ta a Thlahpa Pathaihpa atua (Zhn. 14:26). Khazohpa ta Ano nata rai hrialâh awpa ta a Thlahpa Pathaihpa he abeizy hnohta tuah ta, a hrosohpazy hnohta tuah ta, a Sawchapaw matlupa chôta soh ta, Apostol-zy nata Awnanopazy liata atanoh taihta atuah lymâpa a châ.
4. Khazohpa ta Ano nata rai hriahnai awpa ta chyhsazy atuah ei (Mt. 10:5; Zhn. 20:21). Khazohpa ta Ano ngiapâtuhpa Awnanopazy he Ano nata a mission rai

hrialâh awpa ta ama hnohta khizaw chhâna taihta  
ylâh ta, hrialâh awpa ta bie a pie ei (Mt. 28:20).

Khazohpa Ano cheingei tlai he mission châ ta,  
misawnari châ ta, misawnari tuahtuhpa a châpa vâta mission  
hnawh a châ.

### **REIPAHMAOHNA**

- 1) Khazohpa Ano tlai he Mission hnawh a châna kyh nama  
novâhnazie lâ tawhta reipasiasia teh!
- 2) Khazohpa ta MEC Mission a hrialâhna kyh nama  
pahnona kao lâ tawhta reipasiasia hra teh!

<b>3 SEPTEMBER 2023</b> <b>SUNDAY</b>
------------------------------------------

## MISSION PAHLYKAWHNA

*Khizaw zydua liata sie ula, 'hmotaopa zydua' hnohna chata Thâtihipha he chho teh u! (Mk. 16:15).*

Mission raihria he tuapa raihria a châ vâta apahlykawh ngâsâpa a châ. Mission pahlykawhna cha khizaw zydua he a châ. Biehrâi Thiehpâ liata khizaw zydua tahpa hawhrâwh ahmâpa he “Cosmos” tahpa Krika reih tawhta a vypa a châ. A yzie cha;

1. Khizaw hmoto yzie, pizie, taotuazie tahpa ta yzie a hnei.
2. Chyhsa nata hmotaopazy azaokhina tahpa ta yzie a hnei.
3. Hmohrohneipa zawhly hmotaotheina tahpa ta yzie a hnei.

Khazohpa mission cha Ano taopa khizaw pôhpalôhpa tlokhuh paduapathina nata a chyhsa taopazy nohto hro taophathina nata amo hnohta apahlaona he a châ. Khazohpa ta a chyhsazy hro liata âpahlaolymâ tahpa ahnona he Isai 7:14 bie liata Immanuel tahpa hawhrâwh tawhta hmô theipa a châ.

A Sawchapaw matlupa zawhzi ta he khizaw pôhpalôhpa he taopa châ ta, châhrasala he khizaw heta Ano cha pahno vei Biehrâi ta a tah (Zhn. 1:10). Cha a Sawchapaw matlupa tlai cha khizaw liata vaw tuah thlâhâ ta chyhsazy ta aly hlei veih ei.

Khazohpa mission he a pahlykawh ngâsâpa a châpa vâta khizaw ta a raihria liamarihpâ he pahno pha leipa ei ta, aly pha

thei hra vei tahpa hmô theipa a châ. Atanoh mission chakaona châbu thokha liata mission field chyhsazy ta ama misawnarizy hnohta “Misawnari na-o lâ a di teh! (Missionary, go home!)” ama tah na su hluhpi chhao a ypa ta pahno theipa a châ.

A Sawchapawpa Zisu Ano pôhpa tlaita “Kei khizaw khaihpa ei châ; ahyrai na zipa cha a zohna liata charei cheita leipa aw ta, hrona khaihpa tlaohnei aw” (Zhn. 8:12) tahpa reih ta, athaisopa Pharisaihzy cheingei ta na bi pahnosapa ado vei chaokha ama tah thlâ haw.

A Sawchapawpa Zisu cheingei ta Khazohpa mission pahlykawhna cha he hawhta a rei heih. “Chatawcha he Khinarâh Thâtihpha he pho zydua pahnosa awpa ta, khizaw zydua liata chhopa ta a y aw; cha khai tawhna chata chhâna cha a vaw y aw” (Mt. 24:14) a tah. Awnanopa cha khizaw y chhoh zydua ta Thâtihpha chhona he a raihria thaby chaipa a châ lymâ awpa a châ. Khizaw zydua liata sie ta kaoki chhâna taihta Zisu Krista pachhana Thâtihpha he a pahno leipazy hnohta chho lymâ awpa he a taovyuh peimawh ngaitapa a châ.

## REIPAHMAOHNA

- 1) Khazohpa Mission pahlykawhnazie hawhta Awnanopa ta eima chakao hai tah theipa a châ nata na pangiasa tlyma?
- 2) Awnanopa ta khizaw y chhoh zydua ta Mission raihria he a raihria thaby chaipa a châ awpa a châ tahpa he nâ pynazie a châ tlyma?

**4 SEPTEMBER 2023**  
**MONDAY**

### MISSION VYUHTUAPA

*Chatawcha Paw ta Sawchapawpa cha khizaw Pachhatuhpa ta y awpa ta a vaw tuah tahpa hmô haw pi ta, eima pahnosa (1 Zhn. 4:14).*

Mission tahpa cha tuapa a châpa hawhta a tuatuhpa vyuhpa ta raihriana he tua chhâna a châ. Biehrai Parohpa nata Biehrai Thiehpa liata mission vuyhtuapa ta a palâsapa he Zisu Krista a châ. Khazohpa mission eima hmônazie nata eima pahnonazie he a Sawchapaw matlupa Zisu Krista liata athaby abôpa ta apahnieh khaipa a châ.

Cha cha khâpa châta e tuapa a châ? Khâpa e a tao aw? Tuatuhpa vyuhpa ta khâpa biezy e a reih aw? Tahpazy tawhta pahno theipa a châ.

1. Khâpa châta e tuapa a châ? Khizaw Ano vâta pachhapa ta a y thei n'awpa vâta a châ (Zhn. 3:17).
2. Khâpa e a tao aw? Dyhchhiepany hnohta Thâtihpha achho aw. Sei atâhpazy hnohta puana bie achho aw. Mochaopazy hnohta mo a pavâsa aw. Taola ataopazy a papua aw. ABeipa palôhtlâhna kô tlâh a-awhkhei aw (Lk. 4:18-19).
3. Khâpa bie e a reih aw? Paw Khazohpa tawhta a hmôpa nata a theipa zydua a pahnosa tyh aw. Khazohpa tuapa a châpa vâta Khazohpa bie a reih aw (Zhn. 3:32-34).

Krizyha sahlaozy cha Zisu Krista liata Khazohpa bieheina apyha, atopa ama châ. Zisu ta ama hnohta “Nama chô liata

thlalôhna y mawh sy! Paw ta kei eina tuapa hawh hrata ei cha tua ei hi. Thlahpa Pathaihpa hnei teh u! (Zhn. 20:21)” a tah. Chavâta amo cha Thlahpa Pathaihpa ta taopathipa châ haw ei ta, apih thiehpa, hmotao thiehpa, hmotaotheina ta tobipa ama vaw châ haw!

Cha taopathina cha taopathituhpa Khazohpa rai hrialâh awpa vâta a châ. Ei pihpathi hawna, pachha châ ei pahno hawna a tahpa ta mission thapasana, mission pahâhna, thlahmih leidiapazy veina ahnei tloh vei khihta cha apipathi leipa tla a châ aw. Thlahpa Pathaihpa ahlaio leipa pipathina nata pachha châna a châ thlyu aw. ABeipa Zisu ta cha “Thlahpa Pathaihpa nama chôta a vaw tlô tita cha hmotaotheina hnei aw ei chi ta, Zerusale tawhta pathaopa ta khizaw kaoki chhâna taihta ei bie pahnosatuhpazy nama châ aw a tah (Ht. 1:8).

Hlâno Penticost Thlahpa atopa zydua kha Khazohpa Thlahpa chhihthapa Khazohpa sawzy ta châ khai ei ta (Rom. 8:14), Thlahpa bipa ta, Thlahpa thapasana cha khâ hneipa ta Zisu vuytuapa ama vaw châ khai haw. Chavâta ama hneina nata hrona zydua taih chhao kha amo châta kynya ta a vaw rao haw ei ta, mission châta tlaio ama vaw hmâh patlô khai hawpa kha a châ.

## **REIPAHMAOHNA**

- 1) Mission vuytuapazy ta ama raihria awpa ta na pahnopazy rei baichha via teh!
- 2) Mission vuytuapa Misawnarizy he pesaw (Pension) pie awpa ma a pha via aw? Mission field liata thina taih ama chakao awpa ta ma? Na pachâna reipapua teh!



<b>5 SEPTEMBER 2023</b> <b>TUESDAY</b>
-------------------------------------------

## MISSION BIETÂPA

*“ABeipa Thlahpa cha ei chôta y ta, dyhchhiepaзы hnohta Thâtihpha chho awpa ta sathaw ei na thupa vâta, Ano chata sei atâhpazy hnohta puana biechhopa nata mochaopazy hnohta mopavâhna hnei heih nawpa kyh zy, taola ataopazy puana awpa ta nata ABeipa palôtlâhna kô tlâh-awkhei awpa ta eina tua” tahpa hi (Lk. 4:18-19).*

Tuapa mo maihta tua chhâna bietâpa ama hnei chyupa a châ. Amo bie khohpa rei awpa châ leipa ta tuatuhpa bietâpa phaoh ta rei awpa a châ. Cha hawhta mission vyuhtuapa chata mission bietâpa deita he a rei awpa a châ.

Cha mission bietâpa cha Zisu Krista Thâtihpha he a châ. Zisu Krista Thâtihpha cha Zisu Ano tlaita Paw tawhta a vaw tlôkheipa bietâ a châ. Zisu Ano pôhpa tlai he cha Thâtihpha chhao cha a châ. Chavâta mission bietâpa cha Zisu Krista he a châ. Cha tlai cha “Thâtihpha” eima tahpa he a châ. Zisu Krista thâtih tlai hi. Cha mission bietâpa Zisu Krista Thâtihpha zy cha he ary liatahpa zy he a châ.

1. Cha mission bietâpa Thâtihpha cha pachhana Thâtihpha he a châ. Khizaw thailei pachâsa n’awpa ta Khazohpa ta a Sawchapawpa khizaw liata a tuapa châ vei. Khizaw Ano vâta pachhapa ta a y thei n’awpa ta tuapa tlao a châ a tah (Zhn. 3:17).

2. Cha mission bietâpa Thâtihpha cha sei puana, khotalaina Thâtihpha he a châ. Zisu ta Nazari Damazon liata Isai châbu reih ta Ano kyh a pahnosapa cha “Ano chata sei atâhpazy puana bie chho awpa ta ei na tuah” (Lk. 4:18) a tah. Bie hmeiseihpa pahno aw ei chi ta, cha biehmeiseihpa chata kho ta a cha palaisa aw ei. Sawchapawpa ta kho ta a cha palaisa khiah tala, khotalaipa nama châ hmeiseih aw (Zhn. 8:32,36) a tah heih. Krista Zisu liata Paw kyhpachâna liamaripa heta sei châna duahmo tawhta khotalaina duahmo lâta apuakhei tyhpa a châ.
3. Cha mission bietâpa Thâtihpha cha mochaopazy mo pavâsana nata chiehleipa patlâhna Thâtihpha he a châ. Zawpi ahluhpi ahnohta a vy ei ta, amo apatlâh ei. Zawpizy cha, reih pathlie theileipazy reih pathliepa ta, pihpasipazy tlâh hâpa ta, mochaopazy chhao ama hmô thei haw (Mt. 15:30,31). Patlâhna raihria he Missionaryzy mission chakaona liata ama hlaotloh kheh chaipa chakaona miakhâ ta a châ hra.
4. Cha mission bietâpa Thâtihpha cha molei ngiathaina Thâtihpha he a châ. Bâtituhpa Zawhana ta Zisu ahmô nahta “Moh te u, Khazohpa Mietakupa Taw, khizaw molei siekheituhpa hu” (Zhn. 1:29) tahpa ta hmiapahnosana a tao. Bei Zisu chata Pharisaihpa Saimaw-o liata pati adoh nota chanô moleipa pakha a vy ta, sathaw rohpahâhpa ta aphei vaw hry ta, asâ ta a vaw hru ngâlâ haipa hnohta “Na moleinazy angiathaipa a châ haw” (Lk. 7:48) tahpa molei ngiathaina bie a vaw phuah

haw! Kalvari Kraws chô liata a bie hnôh chaipa chhao cha molei ngiathaina bie he a châ. “Ei paw y, amo he a ngiathai teh; ama hmotaopa he ama pahno vei na” (Luka 23:34) tahpa a châ. Mara Awnanopa liata ahria pathu chaipa Thâtihpha chhao he molei ngiathaina Thâtihpha he a châ thlyupa ta ei ngiapâ.

5. Cha mission bietâpa Thâtihpha cha thina pahniena Thâtihpha he a châ. Zisu ta “Kei he thyuheihna nata hrona cha ei châ, ahyrai na ngiapâpa cha thi hrasala a hroh thlâhâ aw’ (Zhn. 11:25) tah ta, Lazara cha thina tawhta pathyu ta a pahro haw. Mara Awnanopa ngiapâna liata hro miah apahnie chaipa Thâtihpha chhao he Zisu Krista thina thyuheihna nata thina pahniena Thâtihpha he a châ hra thlyu aw. Cha cha rikô liata kuchabaipa ta ABeipa eima reithai theina lia heta âlâpasia kaw.

He a chô liata mission bietâpa mia 5 zy he bietâpa hluphi a ypa hryta mission chakaona liata peimawh via chaipa nata hmâ hlulh via chaipazy a châ.

## REIPAHMAOHNA

- 1) Mission bietâpa liamarihpa he khâpa e a châ aw? Mission bietâpa mia 5 thota ahropa nama pahno viapazy rei baichha via teh!
- 2) Mara Awnanopa liata ahria pathu via chaipa Mission bietâpa he “Molei ngiathaina nata thina pahnienyazy” he a châ thlyu aw ei tahpa he nâ pynazie a châ tlyma? Achhâpa reipasiapâ teh!

<b>6 SEPTEMBER 2023</b> <b>WEDNESDAY</b>
---------------------------------------------

## MISSION SU

*Na khinarâh vaw tlô mawh sy; Na khoHPa la avâ liata ama tahpa hawhta alei liatapa ta tah mawh sy (Mt. 6:10). SahlaO chyHPa saih u, chi khah u, Khinarâh a cha piepa ei he, nama Paw aly ngaitana a châ (Lk. 12:32).*

Raihria to he hriana su ahnei chyupa a châ. Mission raihria chhao he su peimawh ngaitapa ta a châ. Cha mission su cha hro ahlyna su he a châ. Zisu thlahchhâ pachupa liata miakhâ a ypa cha “Na Khinarâh vaw tlô mawh sy. Na khoHPa la avâ liatapa ta ama taopa hawhta alei lia tahpata tao mawh ei sy” tahpa he a châ. He he a vârh mo hro alei mo ta eimâ hly n’awpa kyh kha a reikhoh chhâna a châ.

Biehrai Parohpa liata Khazohpa ta mission su a vaw tly tuapa cha Idah (Eden) he a châ. Anodeikuala chyhsa ta vârh hro ahlyna su Idah kha a vaw paosai syulyu haw. Cha tawhta a vaw tly heihpa cha Kana râh he a châ. Châhrasala Khazohpa pho tlypazy ta Khazohpa ama tleisai haw heihpa vâta Kana chhao kha vârh khinarâh ta tao patlô thei khao veih ei.

Biehrai Thiehpa liata deikua cha Abeipa Zisu ta mission su a vaw tlypa he a yzie a vaw panano syulyu haw. Cha cha chyhsa nawhpazy he a vaw châ. Chyhsa nawhpa ama tahpazy cha Zisu ThâtiHPa a pahno leipa, moleipa hmoparaopa, sihryHPa, chiehlei-tlâhleipa, mochao-nahpâpa, pathlua-

pachhahpa, riethei- dyhchhiepa, baotuh-reikheituh hneileipa, reipachhie-mohnaopa, riepako- tlybaipa, lô-o patâhpa, heih lyuleipa hpz... he ama châ. Amo liana heta Khazohpa Khinarâh a tlô haw a tahpa a châ. Hezy liana heta Khazohpa Khinarâh Thâtihpha he chho awpa a châ. Hezy he mission su cha a châ.

ABeipa Zisu khizaw liata apôhpa ta a vaw hlai haina daihti nota Thâtihpha atlôna su hluhpi a y. Chazy hry liata miakhâ cha Zerikô khih liata chyhsa zawpizy ta reipachhie mohnao ngâsâpa ta ama pathlua hawpa chhiekheituh molaipa Zakia nawh o chhôn liana heta Thâtihpha cha a vaw châ thlâh haw (Luka 19:1-10).

Keimo lei chyhsazy ta eima pahrâna alei su he vârâh mo hro eimâ hlyna su pachâsa awpa he mission raihria liamarihpa a châ. Cha cha avâ mo ta Khazohpa khohpa ama tao tyhpa hawhta lei mo chhao Khazohpa khohpa pataosa hra awpa he a châ. Cha Khazohpa khohpa pataosa n'awpa su cha eima yna alei su liana tlai heta a châ. Cha cha Thâtihpha ta atla bâ leina su, ahria bâ leina su, sapa nata thlahpa liata anawhchaipazy yna su lâ liata siepa ta hria pathao awpa he a châ. Cha su liata mission raihria chakaopa he Zisu Krista Thâtihpha chho n'awpa mission su a do ngaitapa a châ.

Atanoh mission raihriana ei chakao e tahta sponsor-zy tluapa ta Krizyhpa y leina su lâ sie leipa ta, Krizyhpa a y chiehpa, Awnanopa aduah chiehpa chhôn liata Thâtihpha chho ta py padua thluna ahluh kaw. Sponsor-tuhpa lâta cha mission raihria hawhta report liata alâ taraw aw ta, a hmeiseihpa ta cha mietakupa paruna raihria a châ vei khiah, sponsor tluana raihria ta tla a châ. Cha su cha Krista mission su dopa ta apy

thei a ru ngâsâ. Awnanopa py achhahina nata khitlâh pabuana he atheilâpa a châ tyh.

Asia râh kawh ngaitapa liata Khazohpa ta Vailimapaw hnohta mission su a piepa cha chi chyh-nawh chaipa Marapa chipho he a châ. Khazohpa tlai chata cha Marapa chi chyh-nawh chaipa chipho, khizaw sawhkhâzy ta ama pahno pha leipa chipho, kô chareih ta kôkha niekhi dâdei chhao kô apa-vei bâ leipa, dyhchhie sipasa chaipa chipho tlai cha a Thâtihpha chakao n'awpa ta 1966 tawhta mission su miah a pie thlâhâ heih chu. Eima châna nata duahmo amopâ ta la pie tlâh rai rai ta châ taraw ngyu aw ma pi. Châhrasala Marapa thatlôna, Marapa hmotaotheina ta la châ aw vei. ABeipa Khazohpa Thlahpa Pathaihpâ ta tlaô a châ hri aw.

ABeipa Zisu ta he hawhta a reih, "Sahlao chyhpa saih u, Khinarâh a cha piepa ei he nama Paw a ly ngaitanazie a châ. Nama hneipa maih zuah ula, sipasapazy hnohta pie teh u" a tah. "Nama ryu yna maih liata nama palôhrupa chhao y tloh aw ta" a tah heih (Luka 12:32-34). Cha khiatala Khazohpa ta Marasaw, Mara chipho, Mara Awnanopa liata ryu miah a piepa he la hmo hro hriapa la châ tiarâh thlyu aw vei. Ano Thâtihpha chakaona mission raihria tlai hena tla a châ thlâhaw tah lei theipa châ vei. He mission su eima hneipa tlai heta Mara Awnanopa he khizaw Awnanopa kôpipazy akaona hry liata dyuchhai pha ngâsâpa, su pha ngâsâpa atanoh taihta miah a tao papuapa lymâ ngâ thlâhâpa châ ta, eima sawnawhzy chhao râh to su to ama pahrâna maih liata ama byhnâ tona thaby chaipa miakhâ chhao a châ hra.

**REIPAHMAOHNA**

- 1) Khazohpa Mission su cha chyhsa nawhpazy he a châ tahpa he nâ pynazie a châ thai tlyma? Achhâpa bah reipasia via tua teh!
- 2) Awnanopa a y chhiehpâ liata Crusade tao ta Mission a chakaopa hawhta sponsor-tuhpa lâta report pie ta, Awnanopa py paduapathlupa ta sponsor tluana he Mission su dopa na tah thei aw ma?
- 3) Khazohpa ta Mara chi pho ryu miah a piepa he Mission chakaona tlai hena a châ tahpa he nâ pyh thei tlyma?

<b>7 SEPTEMBER 2023</b> <b>THURSDAY</b>
--------------------------------------------

## MISSION CHHÂPA

*Khazohpa ta khizaw kyh pachâ ngaita ta, chatanachata a Sawchapawpa matlupa pie ta, Ano cha ahyrai a ngiapâpa maih leidia leipa ta, chhâzaw hrona tlaô ama hnei nawpa ta (Zhn. 3:16).*

Mission chhâpa tahpa he Mission hnawh tahpa liana khata Khazohpa palôhrupa a chhâzie eima pahno hawpa kha a chhâ. Cha cha Khazohpa kyhpachâna he a thabya, a liamarihpa a chhâ. “Khazohpa ta khizaw kyh pachâ ngaita ta, chatanachata a Sawchapaw matlupa pie ta,” a tahpa heta Khazohpa ta ahmotaopa khizaw nata achyhsa taopazy chhâ ta a kyhpachâna thapasana he padiahsa thei, pa-ôhsa thei rimâpa chhâ vei tahpa he apalâsa ngâsâ kaw.

Chavâta Khazohpa mission chhâpa cha achyhsazy pachha eima chhâ thei nawpa ta a Sawchapaw matlupa hrona chhao pahlôh leipa ta a piena he a chhâ. Missionary hluhpi a pachutuhpa, Bishop Sargent ta cha “mission chakaona chhâpa cha kyhpachâna ta thapasa pi ta, amo chhao kyhpachâna hmeiseihpa tlaita miah ama pahno thaina nata khizaw chyhsa zydua Krista liata unawh sietanôzy chhâpa ta kyhpachâna ta tha apasapa ta eima chahry pabaoh raihrina he a chhâ. Cha kyhpachâna liamarihpa cha Kalvari Kraws thaby liata ngiapâna palôhrupa tawhta vaw pahno pathao pi ta, cha



tawhta a vaw puapa kyhpachâ thapasana chata ‘Abeipa, kei he liata ei y, na tuah teh’ tahpa ta hro tlokhuh ahlâpa ta mission eima chakaona he a châ” a tah.

Lyuchâpa Pawla ta cha “Khazohpa chata a kyhpachâna cha reithai tlâhpa ta paluahsa ta, moleipazy eima châ nona khata Krista eima vyuhpa ta a thipa vâna khata” (Rom. 5: 8) tahpa ta a reih. Cha Khazohpa kyhpachâna liamaripa Zisu Krista liata ahmô pasia hawpa Apostol-zy nata Thlahpa Pathaihpa atopa hmiatua Awnanopazy chata rietheina, pachhiparyna nata taolana hluhpi chhao chi leipa ei ta, Krista châta hro ahlâpa ta ama vaw chakaopa kha a châ. Pity nata Zawhana chata ryureituhpazy hnohta “Keimo la hmo eima hmôpa nata eima theipazy kha rei leipa ta y thei ma pi” (Ht. 4:20) tahpa ta amâ châhkhei ngâlâpa kha a châ.

A pachha châna apahnopasia thlâhâpa ta, mohropa pachha hra awpa ta kyhpachâna, mission thapasana nata veina ahnei leipa chyhsa cha pachâ byuhpa a châ. Lyuchâpa Pawla ta “Eima hru khihta la Khazohpa châta châ ta, eima so khihta la nâmo châta a châ. Krista kyhpachâna chata eima chôta biehei ta, chyhsa zydua thi vyuhpa ta mo pakha a thi tahpa eima pahnopasiapa vâta, ahrohpazy chata amo châta hro khao leipa ta ama thi vyuhpa ta a thipa, a thyuheihpa châna chata tlo ama hro n’awpa ta a châ. Ato Khazohpa tawhta a puapa châ ta, Ano chata Krista vâta Ano nata aryhpa ta maniah tao ta, aryhna chakaona raihria maniah a pie, chatanachata Krista vyuhpa ta lyuhchâpa eima châ” (2 Kaw. 5:13- 20) a tah. ABeipa Zisu chhao tlaita a pakah cheingei ta Saika tikhaoh kiah liata a

rei hrapa cha “Na tuatuhpa khohpa taopa nata a raihria paloh awpa he na ei pati a châ” (Zawhana 4:34) a tah.

Cha cha Khazohpa kyhpachâna liamaripa mission chhâpa cha a châ.

## **REIPAHMAOHNA**

- 1) Pachha châ ei pahnopasia haw a tah tloh ta, Mission thapasana nata veina ahnei leipa Awnanopa he khei hawhpa Awnanopa e a châ aw tly?
- 2) Mission châta sôh eima thyu lymâna chhâpa he nâma palôhrupa liata a chaveina dâh/ a chahriana dâh kheita e a y tly? Byhnâ tona châta maw na pachâ via? Leidiapazy mo pakha ta chha pachha thei hra nawpa châta maw?

<b>8 SEPTEMBER 2023</b> <b>FRIDAY</b>
------------------------------------------

## MISSION THATLÔNA

*Châhrasala “Thlahpa Pathaihpa nama chôta a vaw tlô tita, hmotaotheina nama hnei aw, Zerusale liata zy, Zudia râh nata Samari râh khito liata zy, kaoki taih chhaota ei bie pahnotuhpazy nama châ aw” tah ta (Ht.1:8).*

Mission thatlôna cha Khazohpa Thlahpa Pathaihpa he a châ. Khazohpa liata apahniehpa missionary raihria taovyuh ânâzие, aveinazie nata thapasanzie zy he a châ. Cha cha Zisu Krista ta a mission chakaona liata a vaw cheipa Thlahpa Pathaihpa hmotaotheina a châpa vâta Nazari khih liata chakaona athao nota “Khazohpa Thlahpa cha ei chô ta y ta, ei na tuah” (Lk. 4:18) a tahpa kha a châ. Cha hawna hra chata Apostol-zy chhao kha Thlahpa Pathaihpa hmotaotheina ta ABeipa Zisu ta “ahripa zydua chô liata hmotaotheina nata biehneina nata pasanazy patlâhsa theina pie ei ta, khito chahryhpa ta Thâtihpha chho laih ei ta, chyhsa hlupizy ama patlâhsa lymâpa” (Lk. 9:1-6) kha a châ.

Pachupa 72 zy hnohna chhao kha “Changie hry liata mietaku taw hawhta ei cha tuah ei hi” (Lk. 10: 3) tah ta parihzy nata râh cha-iazy tly theina su liata a tuah ei. Pachupazy chhao cha sie ei ta, Thâtihpha cha Zisu bie ta hawhta chho laih ei ta, ama vaw tlô nata ama chakaona kyh report ama vaw piepa cha “Abeipa, ahripazy chhao nâma moh vâta eima rei sai ta ama y”

(Lk. 10:17) tahpa ta ama chakaona hlaotlohpa kyh report ama vaw piepa a châ. Cha ama hlaotlohna cha amo sapa thatlôna nata taotheina vâna khata châ leipa ta, amo liata a ypa Khazohpa Thlahpa Pathaihpa hmotaotheina zawhzi vâna khata a châ.

Mission thatlôna cha chyhsapa taotheina nata hriatheina liata apahnieh leipa ta Khazohpa Thlahpa Pathaihpa hmotaotheina liata khâcha a pahniehpa tiao a châ. Misawnari Vailimapaw he Mararâh lâta a vaw sie awpa nota bie ama tâpa miakhâ cha “Na thlahchhâna he na hiao ta châ mawh sy” ama tah ne tahpa ta miah ama chho. Phusâ hnei vei. Baotuh Awnanopa nata mission society hnei hra vei. Châhrasala a thlahchhâna chata Khazohpa Thlahpa Pathaihpa zawhzi ta Marapa châta hmo rônah ngaitapa miah ataopa thlâh haw.

Marasaw Thâtihpha kô 50 Jubilee daihti nota Thlahpa Pathaihpa pahrana vâta Awnanopa ngiapâtuhpazy liata Khazohpa Thlahpa Pathaihpa ta rai vaw hria hrata, kôkha niekhi chhao sâh a pavei beih leipa Marasaw, sawhkhâ lâpi okyh phapa chhao ahnei leipa Marasaw, o pha lyu pha chhao a taothei-hneithe leipa Marasaw tiai cha 1966 tawhta atanoh taihta missionary Awnanopa pachyu ngaitapa ta eima vaw châ ngâlâ thlâh haw. Eima hneina vâta a châ ma? Châ tiarâh vei. Eima dyhphapa vâta mission eima vaw chakao theipa a châ ma? Châ tiarâh vei. Mara Awnanopa ngiapâtuhpapa mopathaihpa palyôhru liamarihpa liata apabupa Khazohpa Thlahpa Pathaihpa hmotaotheina tawhtapa, sapa pachâna ta hmô papua, pahno papua thai lei, thei papua thai lei awpa ta

ama chhôn liata khâcha a pabu hawpa, ama y khei thei leipa thlahpa leidiapazy thapasana nata veina vâ deita a châ. Cha tlai cha mission thatlôna cha châ ta, mission hlaotlohna chhao châ heih ta, eima byhnâ tona chhao a châ.

Khâpa vâta e mission a thatlô? ABeipa Zisu ta “Paw ta kei eina tuapa hawh hra ta, kei ta ei cha tuah ei hi” (Zhn. 20:21). “Alei nata avâ liata bieheina zydua ei hnohta piepa a châ haw. Sie ula, pho to pachupa ta tao ula, Paw nata Sawchapawpa nata Thlahpa Pathaihpâ moh ta bâti teh u!” (Mt. 28:18-19). “Thlahpa Pathaihpâ cha nama chô ta a vaw tlô tita, hmotaotheina nama hnei aw. Chatanachata Zerusalem tawhta pathaopa ta, kaoki taih chhaota ei bie pahnotuhpazy nama châ aw” (Ht. 1:8) tahpa ta hmotaotheina nata bieheina piepa ta tuapa raihria a châpa vâta mission athatlô chhâpa a châ.

Chavâta mission raihria châta châ y mâh vei, hnei mâh vana, ama tahpa chi châ vei. Meikâ tilai pachhana raihria ta a châ. Abyuh chatlie cheingeipa raihria a châ hawpa vâta ama pasai nata pasaileipa chhao ta chhupâ lai, lapâ lai tah theipa raihria ta a châ. Mission Board zy ta Beiparisôh cha chyhsa nô-azipâna chôta nata kâchhiepâna chô ta khei lai awpa chi châ leipa ta byuh chatlie ngâsâpa ta Awnanopa ta abie âtaihpâ hawhta la lai awpa a châ. Cha cha ABeipa Zisu ta Khazohpa Khinarâh cha thachahra ta la awpa na a châ e a tahpa kha a châ.

**REIPAHMAOHNA**

- 1) MEC Mission he a thatlô na tah ma? Tlô tu khao vei na tah ma? Athatlô pazao lymâ thei nawpa ta kheita tao si la, a pha via chai aw tly?
- 2) Mission chakaona he meikâ tilaipa pachhana raihria hawhpa a châ thlâhâpa ta khâpa vâta e Mission Board-zy ta Beiparisôh khe i awpa a châ nota ama kâchhie kaw tyh tly?

<b>9 SEPTEMBER 2023</b> <b>SATURDAY</b>
--------------------------------------------

## MISSION CHÂTAW

*Cha vâna chata Zisu moh ta chyhsa to avâ liatapa zy, alei liatapa zy, alei ry liatapa zy chhaota, ama pakhu panei nawpa nata Paw Khazohpa parônahsa nawpa ta 'Zisu Krista cha ABeipa a châ' tahpa ta paleih to ta a phuah nawpa ta (Phil 2:9-10).*

Raihria to he châtaw ahnei chyupa a châ. Lyu hneituhpa châtaw cha hakô nie khi sâh pavei awpa a châ. Khazohpa mission chhao he a châtaw lai ngaitapa ahneipa a châ. Cha Khazohpa mission châtaw cha kaono lâta eima reih aw.

### **1. Mission châtaw kaokhâna cha Idah thiehpa paduana raihria a châ.**

Idah liata hro khoh achhih ngâsâpa, Khazohpa nata chyhsapa aryh ngaitapa ta hmaohkha ta chareilâhna hro angia ngaitapa kha taotuapa chyhsazy khata ama vaw pahlei syulyu haw. Kha thlalôh ngâsâpa ta Khazohpa nata hmaohkha ta acharei khohna hro angia ngaitapa kha Krista liata athiehpa ta hnei pakhua heih nawpa ta mission raihria he chakaopa a châ. Chavâta lyuchâpa Pawla ta “ahyrai Krista liata a ypa chata hmotao thiehpa vaw châ haw ta,” (2 Kaw. 5:17) a tahpa kha mission châtaw miakhâna ta a châ. Krista hro ahnei leipa khizaw chyhsa zydua hnohta Krista Thâtihpha chho ta, Krista lyuna hro angia ngaitapa pahneisa khai awpa he mission

châtaw ta a châ. Kaokha lâta eima rei khiahta cha Khazohpa nata a ryh khaoleipa khizaw, chyhsa nata hmotaopazy chhao taih kha Zisu Krista vâta Khazohpa nata a ryhpa ta y heih awpa ta taopathina raihria he a châ.

Atanoh mission field liata cha chyhsazy thlahpa lâ ngiapâna hro he Thâtihpha ta taopathi chaimâh taraw pi ta, sapa pôhpa lâ hro alyna, hnatlâhna, hmahsiena nata hmotaopazy aryhna hro deikua he eima chakao phahla ngaita chypa ta âlâ kaw.

## **2. Mission châtaw kaonona cha Krista Abeina râh paduana raihria he a châ.**

Zisu Krista ta Ano Krista Abeina râh a paduanazie cha, “Ano ta cha Khazohpa hawhta y ta, Khazohpa tluta ypa cha tlaichhai thei awpa ta rao vei. Chyhsapazy hawhta vaw pipa ta, sei hawhta a tao. Ano sasyh ta tlaô â panawh. Thina taih reingiapa ta Kraws liata a thi haw” (Phi. 2:6-8) tahpa ta lyuchâpa Pawla ta a vaw reih. Â panawhna nata reingiana hro he Krista Khinarâh paduana chhaichhi peimawh ngaitapa a châ.

Atanoh eima Awnanopa mission chakaonazie eimâ vaw laichÂdai tita, Misawnari thokhazy cha Krista Abeina râh padua leipa ta keimo abeina râh tlaô padua hai khiah pi e tah awpazy a y pathlei haw tyhpa alyuna a y tyh. Châhrasala atahmâ ta eima Misawnari zydua he cha reisipa nata reingiah ngaitapazy sai ama châpa ta a lâ.

Zisu moh ta chyhsa to Paw Khazohpa parônahsa n’awpa ta Zisu Krista cha ABeipa a châ tahpa ta ama phuah thei awpa he mission châtaw lai ngaitapa cha a châ. He kyh tlai he Pawla ta Ephesi Awnanopa liata “Khazohpa ta achhuahna bienyupa pahno awpa ta maniah pasaih ta, Ano Abeina khonazie ta



khizaw zydua Krista liata pakipa ta ypa ta” (Eph. 1:9-10) tahpa ta a reipa kha a châ.

Chavâna chata mission châtaw cha Idah thiepa paduana nata Krista Abeina râh paduana raihriazy he a châ. He châtaw khai thei nawpa he eima tuapa Misawnarizy noh to hro nata chakaona liata a pahnieh ngâsâpa a châ.

## **REIPAHMAOHNA**

- 1) Mission field-zy liata phupy nano nanopa Misawnarizy ta a chakao chhichhupa ta Awnanopa py eima padua chyupa he Idah thiepa taopathina eima tah thei aw tlyma?
- 2) MEC Awnanopa ta “Zisu Krista cha ABeipa a châ” tahpa bie a vao pi ta, Krista â Bei hmeiseihna su nata â Bei thei mâh leina su zy reipapua teh!

<b>10 SEPTEMBER 2023</b> <b>SUNDAY</b>
-------------------------------------------

## MISSION ACHHUAHPA

*Leidiapazy thua ta pachha awpa ta chyhsa Sawchapawpa he a vupa a châ (Luka 19:10).*

Hmo to nata raihria to he achhuhpa ahnei chyupa a châ. Mission raihria chhochhi cha achhuhpa peimawh ngaita kawpa ahnei via pachai. Zisu Krista ta a mission achhuhpa tlâhpipa miano cha “pachha awpa” nata “chakao awpa” zy he a châ. Ano pakah tlaita “Chyhsa Sawchapawpa he leidiapazy thua ta pachha awpa ta a vupa na a châ” (Lk 19:10) a tah. He bie tlai he Saika tikhao kiapâh liata hawrawh hropa hmâpa ta “na tuatuhpa khoHPa taopa nata a raihria paloh awpa he na ei pati a châ e” (Zhn. 4:34) tahpa ta a rei heihpa kha a châ.

Lyuchâpa Pawla ta pa-i thlu via heih ta “Krista Zisu moleipazy pachha awpa ta khizaw liata a vy tahpa he ngâchhihpa nata a py tlâh ngaitapa a châ” (1 Tim 1:15) a tah. Zisu Krista mission chakaona achhuhpa cha cha daihti nota chyhsazy hnabeiseihpa, ama chariahpa nata mohnaotuhpazy ku tawhtapa pachha awpa ngâlâh deita kha châ leipa ta, “a chyhsazy ama molei hmoparaona tawhtapa pachha awpa” (Mt. 1:21) kyh kha tlao a châ via pachai.

Zisu Krista mission achhuhpa miakhâna cha achyhsazy pachhapa nata a Thâtihpha bie ta pasa awpa zy he a châ. Apostol-zy mission cha Zisu Krista pachhana Thâtihpha tlâh-

awhkhei awpa he a châ. Thâtihipha tlâh-awhkheina he Zisu Krista pachhana mission chakaona liata tlokhuh amâ pahlaona kha a châ. Amo cheingei ta mohropa pachha thei vei hr'ei sala, Zisu Krista pachhana raihria liata tlokhuh ta amâ pahlaon lymâpa kha a châ.

Lyuchâpa Pawla ta cha “Thâtihipha liata ei bieheina cha hmâ khai leipa ta, cha Thâtihipha cha hlao leipa ta ei chakao theina he a châ. Chyhsa hluhpi ei pahnie thei n'awpa ei ta, chyhsa zydua sei ta ei tao. Khei hawhta chhâma taopa ta thokhazy ei pachha thei n'awpa ei ta, chyhsa zydua hnohta ato ei tao haw. Thâtihipha vâta ato tao tyh na ta, byhnâ ei hmô thei n'awpa ta” (1 Kaw. 9:18-23) tahpa ta a reih.

Zisu Krista mission achhuahpa mianona cha “chakao awpa” he a châ. ABeipa Zisu ta Ano kyh a reipa cha “Chyhsa Sawchapawpa he chakaopa ta y awpa ta a zupa châ leipa ta, chakaotuhpa ta nata chyhsa hluhpi chatlai nawpa ta a hrona a pie awpa ta tloa a zupa a châ” tahpa ta a reih. Cha chakaona cha sei ta ataona nata thina taih a reingiana he a châ. Cha cha hmô pasia thei nawpa ta ABeipa Zisu ta Makanô-o liata Zâpati hnôh chaipa Zawpakho pati ataona liana khata a pachupazy pheipasi pa ta a hmotaona ta a palâsapa kha a châ (Zhn. 13).

He duahmo he mission chakaona liata a mopâ thai ngâsâ awpa ta aphapa a châ. Misawnari thokhazy cha ama mission field chyhsazy liata chakaotuhpa ta ypa hlâta chakaopa châ awpa ta, abei hawhta ama tao thai kaw tyh. Keima field pahypa tuapa a châ, keima eih a châ tahpa ta pachâna hneipa ta amo eih cheingeipa hawhta kyhpachâna hnei awpa hlâta cha amo ama vaw zana awpa nata ama vaw palyupalihna hlao awpa

khohpa vâta amo tawhta chakaopa ta y awpa he ama vaw tlaichhai tlamaw thai kaw tyh hrapa a châ.

Atanoh Mara Awnanopa ta cha eima hnei chhôhpazy chhao taihta a pahlôh leipa ta mission châta thyupakhy chyu pi ta, thlahchhâna chhao mothlih tlana taihta eima bao pazao lymâ. Eima mission field-zy liata Misawnarizy chhaota dyhchhie chaipa hawhta ama niedo awpa nata sawnawhzy saku pakiasa theina awpa ta âteihzy, âhnalasizy tuapa ta ama zua ngâlâna taihta rairu riethei ama tao ngâlâna zydua he Thâtihpha liata sei ta ataopa ta eima chakao ngâna heta mission achhua hpa châtaw eima nuapa eima khai hawna miakhâ chhao a châ thei aw tlyma? Atanoh eimâ pie pasaina, eimâ pahryuna nata eima riethei sipasa dyhchhienazy he la noh hro ta eima rônahna awpa nata la pakho khi chhao châ thlyu rawlaw aw vei. Chavâta mission achhua hpa ‘pachha awpa nata chakao awpa’ raihria he la Awnanopa khizaw liata a y chhôn zydua ta eima pati pahâ hpa a châ lymâ awpa abyuhpa a châ. Awnanopa hrona nata laiseihna cha mission a chakaona liata a theilâ âlâ awpa a châ.

## REIPAHMAOHNA

- 1) MEC Mission chakaona kô 50 chôlâ eima kaw pha hawna lia heta Mission achhua hpa miano (2) he liahsa eima chakao haw tahpa ta na chhôn a cha hmôkhei thei ma?
- 2) Mission field liata eima tuapa Missionary-zy ta ramawteih akao ta zua ngâlâna taihta ama dyhchhie sipasapa he a khâpa vâta a châ nahta e na pangiasa tly?

<b>11 SEPTEMBER 2023</b> <b>MONDAY</b>
-------------------------------------------

## BIEHRAI PAROHPA MISSION CHA

*Alei nata achhoh liata a ypa zydua he ABeipa eih a châ, khizaw nata a chhoh liata a pahrâpa zydua chhao he (Hlazy 24:1).*

Biehrai Parohpa he Khazohpa mission thabya a châ. Khazohpa mission thâtihsy rona châbu chhao a châ. Chavâta Biehrai bu chhoh zydua he ahmia chohkyh tawhta pathaopa ta ahnôh chohkyh taihta mission mokhaoh lâ tawhta eima sai khiahta cha Misawnari châbu tah theipa a châ.

Krizyha mission yzie he Biehrai Thieha tawhta athaopa alyu kaw taraw nota Biehrai Parohpa liana heta athari thlâ chieha saita a vaw châ haw. Biehrai Parohpa mission tahpa bietlâhpa ry liana heta bietlâh 3 ta eima pachhah tua aw.

- 1) Khazohpa cha hmotaopa to misawnari a châ. *(He liana heta hmotaopazy chata Khazoh hmochhuaaha; Chyhsa taona liata Khazoh hmochhuaaha nata Pachhana châta Khazoh hmochhuaaha tahpa bietlâh chyha mia 3 ta eima pachhah pachhua aw).*
- 2) Khazohpa cha chyhsa to Misawnari a châ. *(He liana heta Khazohpa phopi paduana mission tahpa nata Khazohpa mission bietaihzy tahpa ta bietlâh chyha mia 2 ta eima pachhah via hra aw).*
- 3) Hrosohpazy mission bietâpa *(He liana heta hrosoh laipazy mission bietâpa tahpa nata hrosoh chyhpazy*

*mission bietâpa tahpa ta bietlâh chyhpa mia 2 chhao eima pachhaih hra aw).*

### **1. Khazohpa cha hmotaopa to Misawnari a châ.**

“Avâ zy khita Khazohpa rônahzie pahnosa ei ta; a ruapa kawh ngaitapa khita a ku zôthaina a palâsa, ama ao cha khizaw zydua liata chahryh khai ta, ama biezy cha khizaw chhâna taih a pathâh” (Hla. 19:1-4) tahpa ta Hlazy châbu rotuhpa ta Khazohpa hmotaopa kyh a palâsa.

Khazohpa cha a hmotaopa chiehpa hmotaopa to chôta thapasana ahnei ngaitapa a châ. He kyh he abei Davi ta he hawhta a reih, “ABeipa cha ngiachhie theipa, thapasana ta a biepa, pathi-iana lâta nainôsôpa, zawngiana thata ahneipa a châ. ABeipa cha ato chô liata chhao a phana, a zawngiana thapasanyzy cha a hmotaopa zydua chô liata y ta” (Hla. 145:8-9) tahpa ta a reih. Khazohpa ta a hmotaopazy chôta thapasana a hneina he Misawnari palôhphao âdo ngaitapa ta a châ.

Khazohpa cha a hmotaopa to zydua chôta ryureituhpa nata pachiatuhpa a châ. Cha cha hla taotuhpa abei Davi ta he hawhta reithaina hla a sa, “Hy ABeipa, na taopa pho to zydua a vy aw ei ta, na hmiakô liata aboh aw ei ta, na moh cha ama vaw palyupalih aw; ABeipa abeidyuchhai cha a vâzy liana khita pa-i ta, a Khinarâh chata a to chô liata ryurei ta,” (Hla. 86:9; 103:19) tahpa ta.

Khazohpa cha a chyhsa pho tlypazy Khazohpa châ ta, Zenitaizy Khazohpa chhao a châ hra. He kyh nata â zaopa ta Khazohpa ta atlypa Persia beipa Kôrasa kyh liata hrosopa Isai ta he hawhta a reih. “Ano cha ei mietaku vaituhpa châ ta, ei chhuahna zydua pi a patlôh aw, phozy cha a hmiakô liata

panawh awpa nata, abei sahlao chaisaihnaazy pathlâpa awpa nata, a hmiakô liata ochhizy pahypa awpa nata ku ochhizy khaw leipa ta pa ysa awpa ta, a ku chachâh lâ ei patupa hnohna chata”(Isai 44:28-45:1) tahpa ta a reih.

A hmeiseihpa ta cha Khazohpa Khinarâh kyh he Biehraï bie liamaripa ta a châ. Biehraï Parohpa liata Khazohpa ta Ano sasyh a palâsanazie nata a pielyunazie zy cha he hawhta a châ.

- 1) Ato taotuhpa ta apalâsapa ta, alei nata avâ tao ta, achhôn liana chata ahmotaopa to ta a pabi.
- 2) Ryureituhpa nata pachiatuhpa ta apalâsapa ta, a hmotaopazy cha moh ta, apha ngâsâ tah ta, hrobïeh ta apalôn apalya ta, byhnâ a aw.
- 3) Pachhatuhpa ta apalâsapa ta, a chyhsazy chô ta akyhpachâ ngiachhiena cha molei hmoparaopa a ngiathaina liata a palâsa.
- 4) Chhithatuhpa ta a palâsapa ta, âchhuahna thabypa ta a châpa ‘khizaw zydua, avâ liatahpa nata alei lia tahpa zydua Krista liata pakipa ta ypa ta thlahpa lâ byhnâ to maniah a piepa a châ.

## **REIPAHMAOHNA**

- 1) Khazohpa cha hmotaopa to Misawnari a châna kyh nâma novâhnazie hawhta reipasïa tua teh!
- 2) Nâma ngiapâna hro liata Khazohpa he kheita e âlâ chainazie a châ? Taotuhpa ta ma? Ryureituhpa ta ma? Pachhatuhpa ta ma? Chhithatuhpa ta ma? Reipasïa tua mah y!

<b>12 SEPTEMBER 2023</b> <b>TUESDAY</b>
--------------------------------------------

## HMOTAOPAZY CHÂTA KHAZOHPA HMOCHHUAHPA

*Chatanachata Khazohpa ta, “Keimo kakuapa ta, keimo hawh tlaita chyhsapa tao ei si la, amo cha tilaipi liata ngazy chô liata zy, a zawpa pavaw chô liata zy, sahro chô liata zy, alei chô liata zy, alei liata alyh thaipazydua chô liata zy bie pahneisa ei suh u!” tah ta (Athaona 1:26).*

Khazohpa cha hmoto zydua taotuhpa a châ tahpa ngiapâna heta Ano Khazohpa khozie nata âchhuahpazy liata zona nata apahnieh ngahna ngiapâna miah a pahneisapa a châ. Hmotaona hmochhuahpa cha hmotaopazy taotheina liata chôlâ ngiapâna hmotao raihria miakhâ ta a châ. Cha cha hmotaopa chyhsazy ta chhie nata pha kho atly theina he a châ. Hmotaopa chyhsazy chhie nata pha khotlyna tawhta pachha papua heih theina chhao a châ.

Khazohpa cha a hmotaona achalih beih leipa ta ataopazao lymâpa a châ. Cha vâna tlai chata “hmotaopazy chata hnabeiseih ngaitapa ta Khazohpa sawzy a vaw luahna cha ngiatiah lei ngaitapa ta ama hâ” (Rom 8:19) Pawla ta a tahpa kha a châ. Achhâpa cha hmotaopazy ta taotuhpa hmiakô liata A moh palyupalihpa ta amâ chhy hra awpa vâta a châ.

Hmotaopazy taochhâpa kyh mia 3 a y. Chazy cha a chyuna lâta eima palâsa tua aw sy.

1. Hmotaopa chi nano nanopazy a pazaopakhi thai vei chhâna



Hmotaopa chi nano nanopazy apazaopakhi vei chhâna he ecology tah ei ta, hmotaopazy azaokhina nata pabohsana kyh achuna tahpa châ ta, a raihria kawh ngâsâpa miakhâ ta a châ. Atanoh khizaw ta he kyh he a râpasua pha ngâsâpa a châ.

## 2. Hmotaopazy chi pathlapa ta poh lymâna

Hmotaopazy chi pathla ta pôh lymâna chhao he ecology achuna liata hmo peimawh ngaitapa miakhâ a châ hra. Atanoh eima khih râh chyhu liata eima mo khihta cha sa nata nga khodah hawhta hmôpa y khao vei. Lyurâh thoti ramawh nata thothei hiahupazy chhao cha hawh pyly a châ hra.

## 3. Hmotaopazy atly patluana

Hmotaopazy atlyh patluana cha he a chô liata hmotaopazy aboh lymâ sala, chi hluhpi pôh sala, hmâtlâh a châ lymâ thei nawpa ta hriatuh awpa ta chyhsapa tao eihrahna he a châ.

He a chô liata mia 3 pa zy hry liata Khazohpa hmochhuahta cha alei thei leipa ta atly papua eihna he a châ. Cha atly papua eihna kyh cha chyhsapa he Ano kakuapa tlaita Ano nata alyupa ta ataona he châ ta, chyhsapa taona liata Khazohpa hmochhuahta tahpa bietlâh liata a kawh via ta eima reih aw.

Khazohpa ta alei nata avâ cha A bie ta tao ta, anodeikuala chyhsapa deita he Ano kakuapa ta, Ano alyupa tlaita a tao. Dolei la ta, aku cheingei ta doleitlo cha su ta, chyhsapa tao ta, a hrona husona chhao a pie ei. Cha cha alei thei leipa ta atly papua eihna cha a châ. Khazohpa ta a hmotaopazy kyhpachâ ta, mohôh ta, pabohsa awpa ta chyhsapa he atao eihrahpa ei a châ. Khazohpa ta Âda nata Ivyh

he chyhsapa chi pathlatuhpa ta a tao ei. Cha tlai cha Khazohpa ta khizaw châna awpa design tao ta a palâsazie cha a châ. Khazohpa ta reih ta, “chi hluhpi pathlapa ta pôhpa ta, aleilô he bie ula, nama rei sai ta pa ysa teh u; tilaipi liata apie thaipa zydua chô liatazy, biehei hra teh u” (At 1:28) tahpa ta bieheina eihrahpa chhao a pie ei.

Khazohpa kakuapa ta taopa chyhsazy pi ta Khazohpa taopa hmotaopa to he vaih ta, pabohsa ta, khâsia mohôh awpa tlai he hmotaopazy chôta Khazohpa hmochohpa peimawh ngaitapa mission raihria miakhâ cha a châ. Atanoh Mararâh liata eikha nota nokhahpa ta akhai pazo thei leipa atuh râhmahpazy hmô awpa hluhpi hnei khao ma pi. Kô hluhpi tawhta a vaw boh laih lymâpa râhmahpazy cha kôkha ta chhameih cheina awpa vâta thlupa ta sahdô zy lyu zy ta eima tao khai haw.

## REIPAHMAOHNA

- 1) Hmotaopazy pabohsana kyh he ngiapâtuha châta Mission raihria peimawh kawpa a châ hraba ta nâ pyh thei ma? Reipasia tua mah y!
- 2) Mararâh liata nokhahpa ta akhai pazo thei leipa atukalohpizy, râhmahpizy eima pabohsa thei leina he Khazohpa achhuahna a chakhiapa eima châpa ta nâ pahno ma?

<p style="text-align: center;"><b>13 SEPTEMBER 2023</b> <b>WEDNESDAY</b></p>
----------------------------------------------------------------------------------

## CHYHSAPA TAONA LIATA KHAZOHPA HMOCHHUAHPA

*Chatawcha Khazohpa ta amo byhnâ pie ta, ama hnohta, “Chi hluhpi pathlapa ta pôhpa ta, a leilô he biepa ta nama rei sai ta pa ysa teh u. tilaipi liata a pie thaipa zydua chô liata zy biehnei hra teh u” tah ta (Athaona 1:28).*

Chyhsapa taona liata Khazohpa hmochohpa liamarihpa cha Khazohpa nata hmaohkha ta charei ta a hmotaopazy chôta biehnei awpa he a châ. Cha cha bie ei hnei hnohkua la tahpa ta ato keima eih, keima rei sai tahpa ta khodah hawhta paraopakei khai hâ awpa he châ leipa ta, hmotaopa to he Khazohpa ta apasô ngaitapa, ângia ngaitapa sai a châ tahpa pahnopa ta a to chôta kyhpachâna hnei awpa he a châ.

“Abeipa bie ta avâzy khi taopa châ ta, a ypa sahlao zydua chhao cha a pakah hu ta taopa châ hra ei ta, Ano ta reih ta, vaw y thlâhâ ta, bie pie ta, a vaw i thlâhâ ta” tahpa ta abei Davi ta taotuhpa reithaina hla asapa Hlazy 33: 6,9 liata eima hmôpa a châ.

Abeipa Khazohpa chata alei nata avâ, achhoh liata hmohro hneipa chi to nata âhnalasi, thothei-hiahupa chi to zydua a pa ysa khai tawhta cha zydua cha mohoh ta khâsia ta, pabohsana raihriapa ta, ahmâtuha nata niedotuh awpa châta nata Khazohpa nata apalaolâh ta, a hmotaopa zydua

pangiapalih ta, tao nyunae awpa châ ta, chyhsapa he ahnôh chai ta a taopa a châ. He zydua atao hlâna heta chyhsapa he taotuapa châ mawh sala, a sy awpa ta thlihua y leipa aw ta, a pahrâ chy nawpa ta alei y leipa aw ta, a nie chy awpa âhnalasi nata thothei-hiahupa chhao y hra aw vei. A thi thlâhâ awpa a châ.

Khazohpa chata ahmo taochiehpâ zydua chô ta Ano nata a palaolâh ta, bieheini awpa, pabohsa awpa ta chyhsapa atao bâ awpa nota a biereipa he atha apawh ngâsâpa ta a lâ. “Keimo kakuapa ta, keimo hawh tlaita, chyhsapa tao ei suh u” tah ta chyhsapa chapaw nata chanô ta a tao e tahpa a châ. A pha thei dah. A palôh tlâh thei dah. Â ly thei dah. A thapha thei dah. Khazohpa ta cha a taopazy cha mo ai tah leipa ta moh thlâ hâ ta, apha kawpa ta pahno ta, mo ai thai leipa ta, apalôh atlâh ngâsâpa vâta ama hnohta a charei lâh lymâ tyhpa ei a châ.

Khazohpa chata Ano kakuapa chyhsapa chapaw nata chanô ta ataopazy hnohna chata a hmotaopa to zydua cha ama moh bi ta, vai awpa ta pie ta, byhnâ a awpa ei. Cha tluta aphapa hai cha! Cha khai tawhna chata amo hnohta zâlâ maihta vârah lâ tawhta azu ta a za palaolâh tyh ei tahpa a châ heih. Amo chhao cha Khazohpa bie ta hawhta y ei ta, amâ tyuduapa vâta ama yna su cha Idah sahdô tahpa a châ. Idah tahpa a yzie cha hro alyna su, hro thaphana su, hro thlalôhna su tahpa a châ. Khazohpa hmochhuahpa cha a chyhsa taopazy chata Ano nata a palaolâh ei sala, a bie ta hawhta y ei sala, chanô chapaw ta a palyupalih rairie ei sala, a cheichalo nairu ei sala, abao veichah ei sala, amo taotuhpa Khazohpa nata hmaohkha ta aryh ngaitapa ta a chareilâhpa ta, amo chhao ta

Khazohpa nata aryh ngâsâpa ta chareilâh hra awpa cha ama hro thlalôhna nata aly thapha ngaitanazie a châ awpa he a hmochohua chaipa cha a châ.

Cha liana chata Khazohpa paryhsanazie hawhta ahneipa ta, chi zy pathla ei sala, Khazohpa byhnâ piepa chhôhkha paduapa ta hro thlalôh ngâsâpa ta ama pahrâ awpa he Khazohpa achhuahna cha a châ. Châhrasala cha hro thlalôh alyna su, Khazohpa nata a palaolâhna su Idah cha chyhsazy chata reingialeina ta ama paosai-tleisaipa a châ hawpa vâta Khazohpa apalôh tlâh khao vei. Sahdô tawhta papuapa ta chhiesapa ama châ haw. Châhrasala Khazohpa ta a mo ai leipa, a kyhpachâ ngaitapa chyhsa nahta aryh heih awpa ta, a palaolâh heih awpa ta, a Sawchapaw matlupa Zisu Krista hmâpa ta Idah thiehpa a vaw padua pathi heihpa kha a châ. Cha cha lyuchâpa Pawla ta Kalatia Awnanopa zy hnohta he hawhta a vaw reih. “Krista Zisu liata ngiapâna vâta Khazohpa sawzy nama châ khai haw. Cha liana chata Zu y vei, Krika y vei, sei y vei, sei leipa chhao y hra vei, chanô y vei, chapaw y vei. Krista Zisu liana chata pôhkha châ tloh ei chi ta” atahpa kha a châ (Kalatia 3:26-28).

He tlupo ta chyhsazy chô ta Khazohpa hmochohua pa phapazy vâna heta Thlahpa mokhaoh ahneipa abei Davi chata he hawhta ABeipa reithaina ai leipa ta hla a vaw sapa a châ. “Hy ABeipa, eima beipa, alei chô zydua liana heta na moh cha apha kaw dia; Na rônahna cha avâ chô lâ na khita y ta. Na avâ na kuzôthaina, thlapa nata awhsi na raopa he ei pachâ na ta la; chyhsapa he khâpa châta ma khâ nâ thei thlâ hâ tly, na ku

hmotaopa zy chô ta biehneina pie chi ta, a phei ry liata a to zydua soh chi ta” tahpa ta a châ (Hlazy 8:1-9).

### **REIPAHMAOHNA**

- 1) Khazohpa ta nâma a chataona chhâpa na pahnonazie reipapua teh!
- 2) Khazohpa taopa na châna a pahnopasiapa ta Khazohpa châta nâma na taotheipazy reipapua teh!
- 3) Khazohpa kakuapa taopa na châna a khâpa liata zy e nâ pahnona dâh a châ tly?

<b>14 SEPTEMBER 2023</b> <b>THURSDAY</b>
---------------------------------------------

## PACHHANA CHÂTA KHAZOHPA HMOCHHUAHPA

*Chatawcha nâ nata chanô he cha padyhsa aw ei nahta, na pathlazy nata a pathlazy chhao ei padyhsa hra aw; cha chata na luh cha padohsa aw ta, na ta a phei ngavahhmaothy thi na padohsa aw (Athaona 3:15).*

Chyhsapa reingialeina, moleina chata vârh cha pachârôh mâchhiesana nata ngiachhiena ta a pabie khai haw. Khazohpa taopa aleilô nata Idah chhao cha chhiesana ta pabiepa ta a y haw, a chhôn pahrâ chyhsa nata hmotaopa zy cha raona, nôpona nata thina ta akhu khai haw ei.

Cha hawpa duahmo yzie zy vâna chata pachhana tao awpa he Khazohpa hmochhuahpa mission raihria lai ngaitapa a vaw châ haw. Cha pachhana cha Khazohpa ta bietaih a vaw hnei pathao hawpa a châpa ta Athaona 3:15 bie liata parih chô ta chhiesana bie liana heta hmô theipa a vaw châ.

Athaona 3:15 bie heta a chyhchai ta Khazohpa mission, pachhana kyh mia 6 ta a châhkheipa a châ.

1. Pachhana cha Khazohpa pa ysapa a châ. Cha pachhana cha hmeiseihna nata ngiachhiena ta a biepa a châ. Cha hmeiseihna nata ngiachhiena cha Khazohpa kyhpachâna kho pathlahna nata loh papuana he a châ. Khazohpa he pachhana hnawh cha a châ. Khazohpa cha pachhana thabya, pachhana taotuhpa nata

- patôpatiatuhpa a châ. Cha pachhana cha Khazohpa pa ysapa châ ta, Ano cheingei tlai he cha pachhana cha a châ.
2. Pachhana cha khakhaipa Sâtâ ku pachona a châ. Chavâta moleina cha khizaw nata chyhsapa chô ta tu zozawna, paraopakei zozawna la châ vei. Moleina cha phana, hmopha taona ta tiah lymâ hâ awpa a châ. Moleina ta tiahpa ta y leipa ula, phana ta moleina cha tiao tiah muh vy tahpa a châ. Cha phana ta moleina tiahna cha Sâtâ ku pachona chhaichhi miakhâ a châpa vâta mission châta hmopha taona nata phana palâsana zy he Sâtâ ku pachona chhaichhi pha ngaitapa ta a châ.
  3. Pachhana cha mo to châta a châ. Cha cha pachhana pahlykawhna cha a châ. Cha chata mongyuh movyh pathlua vei, molai mochyh pathlua vei, sipasa hneirôh pathlua vei tahpa reina a châ. Châhrasala mo to zydua ta pachhapa ama châ khai haw aw tahpa reina la châ hlei vei. Ahyrai angiapâpa maih leidia leipa ta pachhapa ta ama y aw tahpa he Khazohpa program ta a châ.
  4. Pachhana cha biepha cheikheituhpa zawhzi ta a vaw y aw. Biepha cheikheituhpa cha chanô pathlapa, chyhsa hmeiseihpa a châ. Ano cha Pachhatuhpa, Abeipa Zisu Krista he a châ. Cha cha Athaona bo 3:15 liata a vaw rei chhielie hawpa na pathla nata a pathla ei padyuhsa aw a tahpa he a châ.
  5. Pachhana cha pachhatuhpa riethei taona tawhta hmôpa a châ. He pachhatuhpa riethei taona he Athaona 3:15



chhana liata “na ta a phei ngavahmaothy thi na padohsa aw” a tahpa kha a châ.

6. Pachhana cha eima noh to hro liata eimâ tyh laih lymâ awpa a châ. Eima pao pathlei no y aw ta, eima thyu pakhua heih aw. Eima pahlei tlamaw no y aw ta, eima hmô pakhua heih aw. Pachhana cha bietaihpâ châ ta, taopâpâ châ ta, achhuahpâ châ ta, a hmeiseihpâ a châ.

He a chô liata palâsapa pachhana yziezy he chyhsapa paona daihti liata Khazohpâ ta paraotuhpâ Sâtâ hmiakô liata a vaw pachhuapanoh chhielie hawpâ kha a châ. Chavâta pachhana he chyhsa nata hmotaopazy châta Khazohpâ hmochhuahpâ a châ.

## REIPAHMAOHNA

- 1) Athaona 3:15 bie liata Khazohpâ pachhana Mission kyh mia (6) liana heta a khei hawhpa pachhana he ma na palôh chahria via chai? Khâpa vâta ma? Tahpa reipasias tua teh!
- 2) He Khazohpâ pachhana Mission heta khâpa Thâtihpâ e a chachhopa ta nâ pahno tly?

<b>15 SEPTEMBER 2023</b> <b>FRIDAY</b>
-------------------------------------------

## KHAZOHPA CHA CHYHSA TO MISAWNARI A CHÂ

*Byhnâ cha awtuhpa maih cha byhnâ aw-pa aw nahta, chhie cha sapatuhpa maih cha chhie ei sa pa hra aw; 'nâma liata khizaw pho to huhiepa ta ama y aw' (Athaona 12:3).*

“Nâma liata khizaw pho to huhiepa ta ama y aw” tahpa bie he Khazohpa cha chyhsa to misawnari a châna liamarihpa sâkha ta a châ. Khazohpa cha a hmotaopa to nata a chyhsa taopa chi to pho to Khazohpa a châ. Khazohpa pachhana mission chhao cha a hmotaopa to nata a chyhsa taopa chi to pho to châta a châ. Chyhsapa châta a châ via pachai heih. Chavâta Khazohpa cha chyhsa to misawnari a châ.

Khazohpa ta a chyhsa châta misawnari a châna raihria he chi nano nanopa ta hluhpi a ypa chhao ta he liata cha ahnohnia chaipa mia 4 he a tlâhpi pa ta eima reih tua aw. Chazy cha he hawhta a châ;

1. Idah liata pachhana mission
2. Naw liata pachhana mission
3. Abaraha liata pachhana mission nata
4. Krista liata pachhana mission tahpazy he a châ.

He mia 4 zy hry liata Krista liata pachhana mission he Khazohpa mission liamarihpa a châ. Khazohpa mission châtaw chhao a châ.

### **1. Idah liata pachhana mission**

Khazohpa cha Taotuhpa a châpa vâta ataopa chyhsa kha a hmoparaona vâta thypathla sa la, ahropa atao pathi thei thlâhâpa a châ. Châhrasala chyhsa pakha moleina vâta chyhsa zydua ama thi hâ awpa kha Khazohpa tlai chata chyhsa pakha thina vâta chyhsa zydua pahrona awpa lâta a tao haw. Cha cha Krista thina liata chyhsa zydua hro nawpa he a châ. Kha nota chapaw nata chanô molei thlahruana pahli nawpa châta savo tao nawpa ta athi tuapa sahroh kha Krista pamosana a châ. Khazohpa ta Idah liana khata pachhana mission a vaw pathao hawpa kha a châ.

### **2. Naw liata pachhana mission**

Naw daihti liana khata chyhsa zydua moleina ta khu khai haw ei ta, athi khai bâ awpa ama châ. Naw mo pakha ABeipa Khazohpa modyhpa a châna siana cha chyhsa chi to pho to pachhana lâta Khazohpa ta a vaw tao haw. Naw cha Khazohpa bie reipa cha dikha ta chhao ei-na hnei vei. Rei angiah ngaitapa ta balyh cha a vaw tao haw. Khazohpa bie reipa ta cheingei hawhta balyh cha a vaw tao hawpa vâta chyhsa chi to pho to pachhana dei châ leipa ta Khazohpa taopa hmohro hneipa chi to pachhana chhao a vaw châ haw.

### **3. Abaraha liata pachhana mission**

Abaraha liata Khazohpa pachhana mission he Khazohpa phopi paduana mission liata a hluch via ta rei awpa châ sa la, he liata deikua cha achyu theina lâta a pathaopatyuana atlâhpipe deita eima reih aw.

Abaraha liata Khazohpa mission cha chyhsa pakha ngiapâna nata siana vâta chyhsa chi to pho to huhiena nata

byhnâ tona mission ta a châ. Khazohpa ta Abaraha cha chyhsa to châta byhnâ châ awpa ta a aw-papuapa nata phopi pathlatuh awpa ta a taopa a châ. Cha nota Khazohpa bie cha “Na râh tawhta, na heinawh tawhta, na paw-o tawhtapa pua la, râh ei cha pamosa awpa lâna chata sie teh” (Athaona 12:1) tahpa a châ. Abaraha ama aw nota Khazohpa bie ataihpa mia 5 a y. Chazy cha;

1. Phopi rônah ngaitapa ta tao awpa
2. Byhnâ pie awpa
3. A moh parônahsa awpa
4. Byhnâ ta pachâsa awpa nata
5. Ano liata khizaw pho to huhiepa ta ama y awpa zy he a châ.

Abaraha liata khizaw pho to huhiepa ta y awpa kyh he Krista liata khizaw pho to pachhapa ta a ma y awpa nata byhnâ atopa, Krista ryu a tolâtuhpa ama châna awpa kyh pachhuapanoh chhielie mission ta a châ.

#### **4. Krista liata pachhana mission**

He Krista liata Khazohpa pachhana mission kyh he cha Biehai Thiehpâ mission tahpa bietlâh liata a kawh viapa ta eimâ chu awpa a châ aw.

He a chô liata eima palâsapa Khazohpa pachhana mission zydua he Krista liata Khazohpa pachhana mission hmiapahnosa chhieliezy ta a châ.

**REIPAHMAOHNA**

- 1) Khazohpa pachhana Mission raihria mia (4) zy hry liana heta miakhâ deita atly mah y tahpa châ sala, akhei hawhpa e nâ tly aw? Khâpa vâta e?
- 2) Abaraha liata pachhana Mission kyh liana heta byhnâ kyh he arei haithapa a châ? Cha khiah byhnâ he khâpa e a châ aw va tly? Khâpa vâta e?

<p style="text-align: center;"><b>16 SEPTEMBER 2023</b> <b>SATURDAY</b></p>
---------------------------------------------------------------------------------

## KHAZOHPA PHOPI PADUANA MISSION

*Na pathlazy cha alei liata dolei zie ta y aw ei ta, nâma liata nata na pathla liana chata khizaw liata pho to ama hu a hieh aw (Athaona 28:14).*

He pho to huhiehna bietaih he Khazohpa ta ei 5 taihta a vaw rei nailaih haithapa bietaih peimawh ngaitapa a châ. Abaraha hnohta ei 3 taih (At 12:3; 18:18; 22:18;) vaw reih ta, Aisika liata vaw reih heih ta (At. 26:4), Zakaw hnohta chhao a vaw reipa (At 28:14) kha a châ.

Abaraha cha phopi paduana mission thabya ta Khazohpa ta a vaw taopa a châ. A phopi papôh nawpa kyh zy bietaih chhielie khai haw ta, cha phopi pahrâ nawpa su chhao a vaw rao chhielie khai hawpa a châ. Cha cha Khazohpa ta Abaraha liata Krista pachhana chi patae ngâsâpa a vaw pachhuahpanoh chhielie hawna cha a châ. Ano cheingei chi ahnei lei nota Sara nôpîpa tlai cha ryu ato awpa sawchapaw piepa a vaw châ. Aisika liata ryu ato awpa chyhsa pano hryta anawh viapa Zakaw ta a topa a châ. Zakaw liana chata phopi pho 12 tlai a vaw duah pathao haw. Phopi rônah ngaitapa ta ei cha tao aw, a vâ awhsi zie ta na chi pathla apôh aw a tahpa cha Zakaw liata mo 12 ama vaw pha chyh.

Khazohpa ta amo cha kheita amâ tyudua awpa e a châ tahpa a vaw rei hlâ via la liana khata Izi liata sei ta ama vaw y

haw. Châhrasala Khazohpa bietaih vâta ama pathla cha apôh chatlie ngâsâ. Izi liata riethei rairuna hluhpi taopa ta sei ama châ khai tawhta Mawsi hmâpa ta Izi ku tawhta pachha papuapa ama châ. Chatawta Para râpathohpa liata kheita e Khazohpa nata kheita a zaopa ta, kheh hawhta a chhupa ta, kheita khihsa-tôtu ama padua aw tahpa kha kô 40 chhoh tlai pachupa ama châ.

Râh taihpa cha Khazohpa chhihthapa ta tlô ei ta, hnei ei ta, Abaraha liata bie apiepa hawh tlaita sapa lâ byhnâ cha ama to pha ngâsâ. Anodeikua thlahpa lâ byhnâ ta a châpa Krista Zisu he chaokha nyupa a châ haw chyh. Sapa lâ byhnâ ama topa cha Khazohpa moh parônahsana châta hmâ leipa ei ta, amâ palaina nata pietuhpa Khazohpa ama tleisaina lâta ama vaw hmâ hawpa vâta Babylaw liata kô 70 chhoh sei ta ama y heih. Cha tawhta Khazohpa ta amo a pachhatuhpa châta Zenitaipa, Persia beipa Kôrasa he a vaw tlyh ta, a vaw hmâpa ei.

Khazohpa ta Izarei phopi he khizaw pho to chi to vyuhpa ta Khazohpa theithai beichaipa châ awpa ta a vaw paduapa ei a châ. Amo he Khazohpa nahta azao ei sala, Khazohpa bie piepa nata bietaihpa ta hawhta a tyuduah ei sala, khizaw pho to ta Izarei phopi liata Khazohpa rônahna nata hmotaotheina ama vaw hmô nata Khazohpa chi ei sala, palyupalihpa ta a vaw chhy ei se tahpa he Biehai Parohpa liata Khazohpa phopi atly chhâna mission cha a châ.

Châhrasala Izarei phopi chata thlahpa lâ pho to huhiena byhnâ ta a châpa Zisu Krista cha a vaw hlady leipa ta, sapa lâ byhnâ liata palôh ama pachho hawpa vâta Khazohpa bietaih

cha a heisaipa ta a vaw y haw. Thokha chyhsa siapazy vaw ypa ta bietaih cha ngiapâna ta vaw hâ tyh taraw ei ta, “keimo ahlah leipa ta amo cha pakipa ta ama y lei nawpa ta Khazohpa ta keimo liata hmo kheihawhpa tlyma a pha viapa achhuanoh hawpa vâta” (Heb. 11:40) tahpa ta Hebarai rotuhpa ta a vaw reipa kha a châ.

Khazohpa phopi paduana mission cha Krista liata thlahpa lâ pho to huhiena byhnâ he a châ.

### **REIPAHMAOHNA**

- 1) Khazohpa phopi paduana Mission liata kheihawhpa phopi e Khazohpa ta padua awpa ta a khoh tly?
- 2) Atanoh ngiapâtuha Awnanopa ta byhnâ byhnâ eima tah ngâla tyhpa he khâpa e a châ aw tly? Khâpa vâta e?



<b>17 SEPTEMBER 2023</b> <b>SUNDAY</b>
-------------------------------------------

## KHAZOHPA MISSION BIETAIHZY

*Chatawcha ei hmiakô liata na chhôhkha nata na khinarâh cha chhâzaw ta khâcha pa-ipa châ aw ta; na beidyuchhai cha chhâzaw ta pa-ipa a châ aw (2 Samuel 7:16).*

Khazohpa Biehai Pathaiha liana heta Khazohpa ta a mission châta a bietaih rônahpa nata peimawh ngaitapa mia 8 a y. Chazy pahripaziah khaipa châ mawh sala, daihti nata dawhzy ta miah âdaih lei awpa vâta atlâhpa ta apachhoh theina lâta eima reih tua aw.

### **1. Idah liata Khazohpa mission bietaiha**

Idah liata Khazohpa mission bietaiha he chyhsapa a pao hlâ via liata Khazohpa ta a vaw taiha bie ta a châ. He liata cha Khazohpa byhnâ cha chyhsa ta Khazohpa rei angiapa ta, a hmotaopazy a mohôh phana liata âpahnieh tahpa he a thabypa a châ. Chavâta he bietaih cha ahnawpa (condition) ahneipa bietaih tahpa a châ. Ahnawpa cha a hmotaopa to biehei ta, mohôh ta, pabohsa awpa he a châ (Athaona 1:26-31).

### **2. Âda hnohta Khazohpa mission bietaiha**

Âda hnohta Khazohpa mission bietaiha he chyhsapa apao khai tawhta Khazohpa ta parih hnohta a vaw reipa bie ta pathaopa châ ta, parih hnohta sa to hry liata chhiesapa ta y pachai aw ta, a py ta alyh ta dolei anie awpa kyh zy, chanô ta sawsana liata a riethei n'awpa zie nata chapaw ta khihsa-

tôtuna liata ahmia mathlai alo ngâpa ta nie ahmô n'awpa kyhzy bietaihpa a châ. Cha thohta chyhsapa he dolei tawhta lapa ama châpa vâta dolei lâta ama kua heih awpa kyh taihta a vaw reipa a châ. He bietaih he cha byhnâ tona bietaih hlâta reingialeina vâta chhiesana bietaih ta a châ. Reingialeina theilâpa cha rietheitaona a châ tahpa he athabya a châ (Athaona 3:14-19).

### **3. Naw hnohta Khazohpa mission bietaihpa**

Naw hnohta Khazohpa mission bietaihpa he ti pa-ua tlô khai tawhta Khazohpa ta Naw nata a sawchapaw pa 3 zy hnohta a vaw taihpa bie ta a châ. He bietaih he cha hmotaopa nata hmohro hneipazy chôta chyhsazy moh rarôh y n'awpa nata china ama vaw hnei n'awpa kyh ta a châ. He liata a vaw nano kawpa bie miakhâ cha 'hmo hro hneipa apie theipa to cha nama châta nie awpa ta a châ aw" tahpa he a châ. Balyh chhôn liata hmohro hneipa chi to apha ngâsâpa ta mohôn ei ta, ama vaw pachha hawpa vâta lymâ ta apiepa ei a châ thlyu aw. Idah liana khata sa nie theina piepa châ mâh vei. Chavâta sa eima nie khoh khihta cha eima khâsia mohôn pha tua awpa he a châ (Athaona 9:1-17).

### **4. Abaraha hnohta Khazohpa mission bietaihpa**

Abaraha hnohta Khazohpa mission bietaihpa cha ahnawpa ahnei leipa (unconditional) bietaih ta a châ. Khazohpa ta Abaraha cha aw ta, panano ta, a pie raruahpa bietaihpa ta a châ. He liata Khazohpa ta pie awpa ta bie a vaw taihpa mia 6 a y. Chazy cha;

- 1) Râh (Kana râh)
- 2) Phopi rônahpa châna

3) Moh parônahsana

4) Byhnâ châna

5) Byhnâ awtuhzy hnohta byhnâ awna nata chhiesapatuhzy hnohta chhiesana

6) Ano liata khizaw pho to huhieh awpa zy he a châ.

He bietaih tlai he Khazohpa ta Abaraha hnohta nata a saw Aisika hnohta zy, Zakaw hnohta zy, hrosopazy hnohta zy taihta a vaw rei nailaih lymâpa a châ (Athaona 12:1-3; 13:14-18; 15:1-18; 26:3-5; 28:13-15).

Abaraha liata Khazohpa biehraina bietaih cha ahnawpa ahnei leipa bietaih a châpa vâta “Khazohpa ngiachhiena bietaih” tahpa a châ.

### **5. Mawsi hnohta Khazohpa mission bietaihpa**

Mawsi hnohta Khazohpa mission bietaih cha ahnawpa ta bie hluhpi taihpa Biehraila bietaih ta a châ. Cha cha biepipa tah ei ta, ryhpa ama tahpa cha a châ. Châhrasala cha ahnawpa bietaih cha ahnawna hnei leipa ta Kalvari Kraws liata ngiachhiena ta pachhâsa (pabâsa) hawpa a châ.

Cha ahnawpa bietaih cha kyhpachâna ta Khazohpa ta Sinai tlâh liata a vaw piepa châ ta, Mawsi ta cha bietaih lôphiapa cha a pathi-ia pi ta a vaw pakai chheih hawpa vâta Izarei sawzy ta cha Khazohpa Biehraila bietaih cha ama vaw paraopakei lymâ hraba kha a châ.

Kha kyhpachâna bietaih kha Izarei sawzy ta Khazohpa piepa ta pachâ leipa ei ta, Mawsi piepa ta ama pachâ hawpa vâta ABeipa Zisu ta Khazohpa kyhpachâna bietaih ta a châna kyh apalâsa lymâpa a châ.

## 6. Râh taihpa châta Khazohpa mission bietaihpa

He he Kana bietaih tah ei ta, Palestine bietaih ama tah hra. Khazohpa ta Abaraha hnohta ahnawpa hnei leipa ta pie awpa ta a vaw taihpa bie kha a vaw pa-i hawna bietaih ta a châ. Cha bietaih cha reingiana nata reingia leina hro tawhta byhnâ nata chhiesana nata a zaokhina kyh kha a châ. Ryhpachanei 28-30 chhôn bie liata eima hmô. Cha liata arei khoh chhâpa cha “Râh ei cha piepa liata na pahrâ tita, na pha khiah byhnâ to aw chi ta, na pha vei khiah chhie na to aw.” Ei bie piepazy nâ ngiah khiah ta, thlao chhipa ta y aw chi ta, nâ ngiah vei khiahta cha chhiesana na to aw tahpa he a thabya a châ.

## 7. Davi hnohta Khazohpa mission bietaihpa

Khazohpa ta Davi liata bie a vaw taihpa he khinarâh abeidyuchhai nata biehneina zy nata a zaopa bietaih ta a châ (2 Samuel 7:4-17). He Davi hnohta Khazohpa mission bietaihpa ta a vaw pa-isapa zy cha a ry lia hawhta a châ.

1) **Davi O, Khazohpa O**; Cha cha Davi chipathla, chhônkhapa tawhtapa abei ta ABeipa o a sa awpa kyh a châ.

2) **Davi Abei dyuchhai**; Cha cha Davi abeina, ryureina, biehneina huha y n’awpa zie kyh ta a châ.

3) **Davi abeina khinarâh**; Davi abeina khinarâh kawhna nata hmotaotheina cha khâ cha apa-i awpa kyh ta a châ.

4) **Chhazaw**; Davi a beina cha chhâna ahnei leipa chhâzaw abeina kyh a châ.

## 8. Khazohpa mission Bietaih thiehpa

Khazohpa mission bietaih thiehpa cha Biehai Thiehpa he a châ. Cha cha Khazohpa ta hrosohpa Zeremiah liata a vaw puah hawpa Biehai Thiehpa ei vaw tao aw a tahpa kha a châ

(Zeremiah 31:31-34; Hebrai 8: 10-12). He Khazohpa mission bietaih thiehpa he cha ahnawpa ahnei leipa ngiachhiena ta pachhana bietaih ta a châ.

### **REIPAHMAOHNA**

- 1) Hy Khazohpa Mission bietaihzy hry liana heta ahy hnohta bietaihpa he ma na palôh chahria chai ta, na paphasa via chai tly?
- 2) Khazohpa ta Idah liata sa nie theina pie leipa ta, Naw hnohta sa nie theina bietaih a piepa heta nâ ngiapâna lia kheita e a chahriazie a y tly?

<b>18 SEPTEMBER 2023</b> <b>MONDAY</b>
-------------------------------------------

## HROSOHPAZY MISSION BIETÂPA

*ABeipa chyhsa zydua cha hrosohpa châ khai ei sa la, ABeipa chata ama chô liata a Thlahpa cha soh chyus sa la (Maluh reina 11:29).*

Hrosohpazy he Khazohpa tuapazy châ ei ta, ama bie reipazy chhao he âmo bie châ leipa ta Khazohpa bietâpazy a reituhpa ama châpa vâna heta he liata “hrosohpazy mission bietâpa” tahpa ta eima reipa a châ. Âmo bie a reihpa châ leipa ei ta, Khazohpa bietâpa tlaô ama reih. Chavâta ama bie reina liata “Abeipa bie cha ei chô ta vaw tlô ta” tahpa he biehmipa liata ama vaw pataihpa lymâ tyhpa ta a châ.

Khazohpa hrosohpazy aluahna bietâpa cha ama chhâ liata, ama hro liata sôkha thlailai hmo a vaw y chatlie haipa duahmozy tawhta a vaw y tyhpa bie ta a châ via tyh. Sôkha thlailai hmo a vaw tlô haipa duahmo peimawhnazie nata â zaopa ta Khazohpa tawhta aluahna ama hmôpa bietâpa cha hrosohpazy ta y khei thei leipa ei ta thlai ama rei tyh. Cha ama hmôpa aluahna bietâpa cha Khazohpa tawhtapa a châpa ta ama pahno khâcha hawpa vâta ama hrona tlai apahlôh leina taihta amâ dua pahroh khei lymâ tyhpa a châ.

Biehraï liata hrosohpazy he apho nano nano ta ama y. Khazohpa hrosoh hmeiseihpazy y ei ta, abeizy ta amo khona lâ tawhta zikyurâna bie areih awpa, âmo chhâh a châ awpa ta

ama pachhuapanohpa hlao niepa hrosohpazy y heih ei ta, khazoh nothlah achhupa sahlaozy hrosohpazy chhao ama y hôlô heih hra. Atahmâ he liata eima rei awpa hrosohpazy cha Biehrai liata Khazohpa hrosoh hmeiseihpazy tawhta mission bietâpazy kyh he a châ aw.

Khazohpa hrosoh hmeiseihpazy bietâpa he ta ama khitlâh hro liata hmo atlô haipa duahmo peimawhzie mopa ta a rei khoh chhâna anuapa mia 3 a hnei.

Chazy cha;

1. He mission bietâpa heta sôkha ta vâtlâh chyhsazy chô liata hmo atlô haipa duahmo chhichâzie a reih. Cha cha historical tah ei ta, a râh duahmo nata â zaopa hmo yzie kyh tahna a châ. Chyhsa vâtlâhzy hmoparaona vâta tlyma, ama abeizy hmoparaona vâta tlyma zy vâta ama chô ta hmo a vaw tlô awpa adyuhna tlyma, chakâhna tlyma, potlana tlyma nata â zaopa ta Khazohpa tawhta zikyu arâna bie a châ.
2. He mission bietâpa heta chhâ a sie haipa liata vâtlâh zawpizy hro liata hmo a tlô haipa duahmo peimawhzie a reih. Cha cha chyhsa hro nata â zaopa hmo yzie ta a châ. Abei tlyma, chyhsa vâtlâhzy tlyma ta ama Khazohpa ama paviasai, amâ heisai, ama tysai, ama tleisai hawpa vâta Khazohpa hiehana ama chô liata a vaw tlô bâ awpa a châ. Chavâta cha ama hmoparaona moleina tawhta ropa ta, ama moleina hmoparaonazy aheisaipa ta, ama Khazohpa-o lâ kua heih awpa ta Khazohpa tawhta zikyu arâna bie ta a châ.
3. He mission bietâpa heta chyhsa vâtlâh zawpizy châta ama rairu rietheina, seichânazy tawhta pachhatuh awpa

Messiah a vy nawpa kyh a reih. Cha cha Khazohpa pachhuapanoh chhieliepa hmo yzie apathu ngâsâpa, thlahpa lâ hro nata â zaopa, thlahpa lâ sawzy ta ama pahno theipa bie ta a châ. Hrosohpa hluhpi ta pachhatuhpa Messiah a vy awpa kyh he vaw reih chhielie khai haw taraw ei ta, Khazohpa pachhuapanohzie he a vaw kathu ngaitapa vâta abeizy, machâzy, ryhpa pachutuhpazy nata Pharisaihzy, theithaipa thokhazy ta sapa mokhaoh tawhta a vaw hlady ei ta, ama vaw suchhei khai hawpa a châ.

Hrosohpazy reikah he cha Khazohpa mission pachhuanohna reikah ta a châ. Cha cha kyhpachâna reikah ta a châ. Cha cha nghiachhiena reikah ta a châ. Cha cha zawngiahna reikah ta a châ. Cha cha thapasana reikah ta a châ. Cha cha pachhana reikah ta a châ. Cha cha misawnari reikah ta a châ. Chavâta he liata bietlâh he hrosohpazy mission bietâpa eima vaw tahpa cha a châ.

Khazohpa misawnari ta a châpa hrosohpazy he hlâno ta Biehraï athaipazy ta ama vaw pachhahpa a châ. Chazy cha atheithai naochaipa ta hrosoh laipa nata hrosoh chyhpa tahpa ta a châ. Hrosoh laipazy mission bietâpa cha hrosohpa Isai, Zeremiah nata Ezekiel zy bie liata hmô theipa a châ. Hrosoh chyhpa mission bietâpa cha a eih via pachai ta hrosohpa Zoel, Amosa, Zawna, Daniel, Habaku nata Zephania zy bie liata hmô theipa a châ.



**REIPAHMAOHNA**

- 1) He hrosohpazy Mission bietâpa nâ chu hai nona heta na palôhrupa liata Khazohpa he kheih hawhpa Khazohpa e a châpa ta ma na palôhrupa liata a cha pahnosa tly?
- 2) Atanoh Awnanopa thokha ta biechhotuh rônahpazy he Khazohpa hrosohpa tahpa tluta rei ei ta, thokha heihta hrosohpa chhâ y khao vei ama tah heih. Nâma zaw kheita e na pachâ tly?

<b>19 SEPTEMBER 2023</b> <b>TUESDAY</b>
--------------------------------------------

## HROSOH LAIPAZY MISSION BIETÂPA

*Tlâhzy liata Thâtihpha tlôkheipa ta adyhna bie tlâh-awkheipa ta, hmo phapa Thâtihpha tlôkheipa ta, pachhana bie tlâh-awkheipa ta. Zaiio hnohta, “Na Khazohpa cha ryu a reih” a tatuspa phei ângia kaw dia (Isai 52:7).*

Hmialâ ta eima vaw rei chiehpa hawhna khata mission bietâpa areihpa hrosoh laipazy cha hrosohpa Isai, Zeremiah nata Ezekiel zy he ama châ. Anodeikuala he ama pa 3 bietâpazy he rei awpa ta châh nata daihti ta miah âkadaih lei awpa vâta hrosohpa Isai liata mission bietâpa he achyu theina lâta tlaio eima reih aw.

Hrosohpa Isai he Evangelist hrosoh rônahpa nata Biehraï Parohpa hmôtheituh abei tahpa ta moh bipa a châ. Khizaw kaoki nata vârah taih hmôtheituhpa hrosoh rônah ngaitapa a châ. A mission bietâpa he kao 3 ta pachhahpa a châ.

Kaokhana liata bietâpa cha chyhsa chi to pho to nata râh to a-ôpa byhnâ bietaihpa a châ. Phopi to tahpa hawrawh a hmâh lymâ. Isai 1- 39 taih bie he châ ta, Isai châbu miakhâna tahpa a châ. He liata a bietâ chaipa cha tlyzaw ryureituh awpa abei Messiah a vaw pih awpa kyh nata ABeipa chatlaipa sawzy kua heih awpa kyh zy he a châ.

Kaonona cha Khazohpa ta Izarei he a lôhkhy ahnia chaipa, tha apasa chaipa a châpa ta a palâsa. A bietâpazy liata “Ei chyhsa, ei pho tlypa, ei phopi, ei thâtih phaotuhpa” tahpa bie ahmâh lymâ. Isai 40-54 taih he châ ta, he liata a bietâ chaipa cha sei duahmo kyh he a châ. Cha cha Izarei he abie phaotuhpa sei rônah chaipa hawhta atlyna nata Messiah cha sei rônahpa ta a tao nawpa kyh he a châ. Cha sei rônahpa maohphaona lai katopi mia 3 zy cha ary liata hawhta a châ.

1. Izarei ta a mission maohphaona cha Khazohpa raopa, rai piepa a châ. Cha chata a palâsapa cha Khazohpa cha mission hnawh ta a châna kyh he a châ.
2. Izarei ta a mission maohphaona cha Khazohpa liata thari athlâpa a châ. Cha chata a palâsapa cha mission raihria he Khazohpa tawhta a châpa vâta mission chakaotuhpa zydua ta Khazohpa liata tlokhuh a pahnieh awpa a châna kyh he a châ.
3. Izarei ta a mission maohphaona cha chi to, pho to nata râh to he a châ. Cha chata a palâsapa cha mission raihria heta thlyuhleih hnei vei tahpa he a châ. Chyhsa zydua nata Khazohpa hmotaopa zydua a-ô khai tahna he a châ.

Kaothôna liata bietâpa cha Izarei paduapathi heihna kyh ta a châ. Cha Izarei rônahna cha chyhsa chi to pho to nata râh to châta byhnâ tona bietaih a-i ngaitapa nata soh ngaitapa ta a châ. Isai 55-66 chhôn bie he a châ. Cha cha chyhsa to byhnâ eima topa he Khazohpa chakao n’awpa nata a moh parônahsapa ta alei tawhta vârah taihta eima reithai

palyupalih laih lymâ n'awpa châta a châ tahpa he a bietâpa thabya a châ.

### **REIPAHMAOHNA**

- 1) Hrosohpa Isai Mission bietâpa kao (3) hry liana heta a kheh hawhpa kao liata e nâma nâ hlao khoh chai aw? Khâpa vâta e?
- 2) Chyhsa to byhnâ eima topa he Khazohpa chakao nawpa, a Khinarâh pakawhsa nawpa nata a moh parônahsa nawpa ta a châ tahpa heta na palôh liata kheita e a châ hria tly?

<b>20 SEPTEMBER 2023</b> <b>WEDNESDAY</b>
----------------------------------------------

## HROSOH CHYHPAZY MISSION BIETÂPA

*Chatawcha a sohpany cha avâ khaihpa hawhta khaih aw ei ta; chyhsa hluhpi siana lâta a paheisatuhpany cha awhsi hawhta chhâzaw ta ama khaih aw (Daniel 12:3).*

Khazohpa mission bietâpa a phaotuhpa hrosoh chyhpazy cha hrosohpa Zoel, Amôsa, Zawna, Daniel, Habaku nata Zephaniah zy he ama châ tahpa kha eima hmialâ liana khata eima vaw palâsa haw chiehpâ kha a châ. He hrosoh chyhpa mo pa 6 zy ta ama vaw phuahpa mission bietâpa cha a ry liana heta achyuna lâta miakhâ miakhâ ta eima vaw palâsa aw.

1. Hrosohpa Zoel liata mission bietâpa cha Zudah chô ta hrohri piena bie ta a châ. Cha cha ABeipa pachiana noh a vaw tlô aw, a moh pado la, cha khai tawhta byhnâ piepa na châ aw tahpa he a châ. A rei khohna theilâpa cha ABeipa pachiana cha chyhsa chi to chô liata a vaw tlô aw, a moh padopa ta kua ei sala, cha hnôhlâna chata chyhsa to chô ta thlahpa a hry n'awpa kyh he a châ.
2. Hrosohpa Amôsa liata mission bietâpa cha khitlâh hro liata siana nata adona a y leina kyh zikyu arâna he a châ. Khazohpa cha mo to pachiatuhpa, mo to pachhatuhpa, phopi to Khazohpa a châ. Khazohpa pachiana tawhta

- ahyhma ta khokhâh thei rimâ awpa châ vei tahpa he bietâ chhâpa a châ.
3. Hrosohpa Zawna liata mission bietâpa cha Khazohpa cha Izarei Khazohpa a châpa hawh hrata Zenitaizy Khazohpa chhao a châ hrana tahpa kyh he a phôhpa ta ropa a châ. Chavâta hrosohpa Zawna châbu he foreign misawnari châbu tahpa a châ. He mission bietâpa ta a rei khohna theilâpa cha Khazohpa zawngiahna cha Zu chyhsa chhao rai, Zenitaipa chhao rai ta ama moleina ropa ta ABeipa a padopa maih châta adaih pakipa a châ tahpa he a châ.
  4. Hrosohpa Daniel châbu chhao he foreign misawnari châbu tahpa a châ hra. Khizaw beizy hmiakô liata riapha ngâsâpa ta Khazohpa moh aduakhei ngahna nata Khazohpa lâta ama palôhru paheisana he a mission raihria cha châ ta, a mission bietâpa cha Khazohpa he khazoh zydua hry liata Khazohpa chônôchaipa nata hmotaothei chaipa a châ; a khinarâh cha avâ nata alei liana heta chhâna ahnei leipa a châna tahpa he a châ.
  5. Hrosohpa Habaku liata mission bietâpa cha ngiapâna nata taozie kyh he a châ. Bietâ tlâhpipea mia 3 a y.
    - 1) Chyhsa siapa cha ngiapâna ta a hroh aw.
    - 2) ABeipa rônahzie pahnona ta alei he a bi khai aw.
    - 3) ABeipa Khazohpa cha a-o pathaihpa liata achhy khai awpa a châ.
  6. Hrosohpa Zephaniah liata mission bietâpa cha ABeipa Khazohpa pachiana cha khizaw zydua chô liata a vaw tlô aw. Chavâta a chyhsa zydua saih u, ABeipa cha tlua

teh u, siana tlua ula, a reisi achhuah teh u tahpa bie he a châ.

Hrosoh chyhpazy liata mission bietâpa cha Khazohpa cha chônôchaipa, sona nata novâhna ta a biepa, pho to zydua chô ta a sona ta biehneituhpa nata a siana ta pachiatuhpa, Ano atluatuhpazy chô ta zawngiana nata ngiachhiena ahneithlu thlâhâpa a châ tahpa he a châ.

### **REIPAHMAOHNA**

- 1) He hrosoh chyhpazy Mission bietâpazy hry liata na palôh chahria chaipa ahy bie he ma a châ tly? Kheita e a chahriana dâh a châ?
- 2) He hrosoh chyhpazy Mission bietâpazy hry liana heta ahy bie ma atahmâhlâ hmo yzie nahta ahmie chai aw tly? Khâpa vâta e?

<b>21 SEPTEMBER 2023</b> <b>THURSDAY</b>
---------------------------------------------

## ZISU KRISTA MISSION BIETÂPA

*“A daihti cha a ki haw, Khazohpa Khinarâh chhao a hnia haw; ro ula, Thâtihipha cha a ngiapâ teh u” (Maka 1:15).*

Biehrai Thiehpa popalôhpa liata mission bietâpa thabypa cha, “Zisu cha Krista (Messiah), Khazohpa Sawchapawpa a châ” (Mathai 16:16) tahpa nata “Zisu Krista cha khizaw pachhatuhpa a châ” (Zawhana 3;16-17) tahpa he a châ.

Zisu Krista nata a Thâtihipha a châhkheina he Paw Khazohpa hmochhuahpa peimawh ngaitapa a châna kyh he Awnanopa mission châtaw ta a châ tahpa he Biehrai Thiehpa ta a sia ngâsâpa ta a palâsapa a châ.

Chavâta khizaw kaoki liata Thâtihipha chhona raihria he chyhsapa parawzet (project) châ leipa ta Khazohpa parawzet ta a châ. Kraws bie he Apostol-zy Thâtihipha phaopa a châ. Kraws hmotaotheina he ama chakao chhâpa châ ta, rônahpa ta a thyuheihna nata a Thlahpa Pathaihpâ ama tona he ama thatlôna nata hnabeiseihna ta a châ.

Zisu Krista mission bietâpa he Biehrai Thiehpa liata Thâtihipha Maka 1:15 liata cha “A daihti cha a ki haw, Khazohpa Khinarâh chhao a hnia haw; ro ula, Thâtihipha cha a ngiapâ teh u” tahpa ta rei hmiasa tuapa châ ta, Mathai 4:17 liata chhao hmôpa a châ hra. He vâna heta Zisu Krista mission



bietâpa thabya he Khazohpa Khinarâh a tlô haw tahpa kyh he a châpa ta pahnopa a châ.

Chatawhta Zisu Krista mission bietâpa a pachuna kyh he Luka 4:18-19 liata a sia ngâsâpa ta hmôpa a châ heih. Cha liata cha Zisu Krista ta Khinarâh Thâtihipha chho awpa ta ABeipa Khazohpa Thlahpa ta a tuana kyh a rei hmiasa tua chaipa a châ. Thâtihipha a chho awpa chyhsazy cha; dyhchhipazy he ama châ. Cha dyhchhipazy cha sapa dyhchhipa nata thlahpa sipasapazy he ama châ. A Thâtihipha chhona mission raihria tlâhpi mia 4 a y. Chazy cha;

1. Sei atâhpazy hnohta puana bie chho awpa; cha cha Sâtâ seichâna, molei seichâna nata khizaw seichâna zy tawhta puana he a bietlâhpi chaipa a châ.
2. Mochaopazy hnohta mo pavâ hnei heih nawpa; cha cha zohna tawhta khaihna lâ chhihthana he a biepi chaipa a châ. Pahnô leina tawhta pahnona lâta, tao thai leina tawhta taothaina lâta, achu leina tawhta achuna lâta tahpa hpz... he a châ.
3. Taola ataopazy puana awpa; Cha cha pakhona ta, *“chata na tahpa vâta na heta na y, chavâta cha cha na vaw taopa la apha aw”* tahpa ta, phoryhpa tawhta zy, pahno leina nata hnei leina zy vâta siechahnaona, riekakona, pasai pa-ina zy hpz... tawhta puana he a châ.
4. ABeipa palôh tlâhna kô tlâh-awhkheina; Sawchapawpa matlupa Zisu Krista bie reipa nata hmotao raihriapazy liana heta ABeipa, Paw Khazohpa a palôh tlâh ngâsâ bâ ne tahpa he a châ.

Chavâta he Thâtiŋpha he cha sipasapazy, dyhchhiepany, tlybaipazy, riepakopazy nata a zaopa Thâtiŋpha ta a châ. ABeipa Zisu Krista ta Ano pakah cheingei ta, thina tawhta athyuheih khai tawhta Apostol-zy hnohta he Thâtiŋpha zy he khizaw chhâna taihta chho awpa ta bie pie ei ta, biehei ngaitapa ta a tuapa ei a châ. Cha cha Zisu Krista mission bietâpa châ ta, “Zisu rai pie rônahpa” ama tahpa a châ.

### **REIPAHMAOHNA**

- 1) Zisu Krista Mission bietâpa he khâpa e a châ? Khâpa liata e a y?
- 2) Zisu Krista Mission raihria tlâhpipa mia (4) y ta, Mara Awnanopa ta he mia (4) zydua heta atlâtloh kawpa ta eima hria ngâla hai eima tah thei aw tlyma?

<b>22 SEPTEMBER 2023</b> <b>FRIDAY</b>
-------------------------------------------

## ZISU KRISTA MISSION LIAMARIHPA

*Pachâ teh u, Khazohpa Khinarâh cha nama hry liata a y (Luka 17:21b).*

Zisu Krista mission liamarihpa cha Khazohpa Khinarâh he a châ. Cha Khazohpa Khinarâh cha Zisu Krista Ano tlai he a châ. Chavâta Khazohpa Khinarâh cha nômo hry liata a y a tahpa he a châ. Chavâna chata Zisu Krista mission liamarihpa cha Zisu Ano cheingei tlai he a châ.

Zisu Krista mission chakaona kô 3 chhôn ta a vaw hria chaipa cha chyhsa palôhru patuna nata leidiapa tluana raihria zy he a châ. Cha raihria cha Bâtituhpa Zawhana chhao ta ama vaw pathaopa a châ. Ama rei chaipa cha Khazohpa kyh, siana kyh, moleina kyh, rona kyh zy he a châ. Ama tlâh-awhkheipa cha Khinarâh a hnia haw, atlô haw tahpa he a châ.

Cha Khazohpa Khinarâh cha hrona thiehpa ta paduapa a châ. Cha hrona thiehpa cha chyhsa thiehpa châna, hmotao thiehpa châna, Krista thina thyuheina ahlyna zy he a châ. Ahyrai Krista liata a ypa chata hrona thiehpa a hnei haw tahpa kha a châ. Chavâta Biehraï Thiehpa ta a reipa hro thieh taopathina cha Krista liata pathaopa châ ta, Krista liata paki awpa a châ. Cha kyh tlai cha hrosohpazy bietâpa kha châ ta, Biephuatuhpa aluahna, Biephualuahpa chhao a châ.

Biehrai Parohpa liata Khazohpa Abeina Khinarâh a reizie cha Khazohpa he a eih viapa ta Izarei zy abeipa, a vâtlâhpa ta chyhsa chi to pho to beipa, a hmotaona lâta hmotaopa to abeipa a châ tahpa ta a reih. Alei he a phei tlyna châ ta, avâ khi a ryureina dyuchhai a châ.

Biehrai Thiehpa liata deikua cha chyhsa palôhru chhôn chaipa tawhta Khazohpa pabeisana kyh he a reikhoh viapa a châ. Cha vâna tlai chata Zisu ta pachutuhpa Rabbai Nikadima hnohta “na pipathi khiahta dei na Khazohpa Khinarâh na to thai aw” tahpa chho ta, Samari chanô hnohta “Khazohpa cha Thlahpa châ ta, thlahpa nata hmeiseihpa ta achhy awpa na a châ e” a tahpa kha a châ.

Khazohpa Khinarâh he châna (qualitative) mia 3 a hnei. Chazy cha;

1. Chyhsa palôhru liata Khazohpa biehneina; Cha cha “Khazohpa Khinarâh cha nama hry liata a y” a tahpa he a châ. Palôhru chhôn chaipa liata Zisu bie apahneisana hih (Luka 17:21).
2. Awnanopa liata Khazohpa biehneina; Cha cha “Zisu Krista cha Awnanopa beipa, Awnanopa luh châ ta, Awnanopa he a pôhpa” a châna kyh kha a châ (Ephesi 1:23; Rawma 12:5; Kaolaosa 1:18).
3. Khizaw liata Khazohpa biehneina; Cha cha “Krista ryureina ry liata a to sopa ta a y tina chata Sawchapawpa tlai chhao cha a ry liata a to a sotuhpa Khazohpa ry liana chata sopa ta a y hra aw; Khazohpa cha ato liata ato a châ thei n’awpa ta” (1 Kawrini 15:28) lyuchâpa Pawla ta a tahpa kha a châ.

Cha vâna chata Biehrai Thiehpa ta Khazohpa Khinarâh kyh a vaw reipa he sapa lâ Khinarâh kyh kha châ leipa ta thlahpa lâ pipathina ta Khazohpa Khinarâh to awpa kyh kha tlaô a châ. Cha Khinarâh cha kyhpachâna, ngiachhiena, zawngiahna, ngâchhiehna ta a chahrypabaohna râh, ady-aryhna nata angiathaina ta chareina râh, thlalôhna râh, alyna nata thaphana chôta ABeipa reithai palyupalihna râh he a châ. Cha cha pachhapa sawzy ta ngiapâna ta thlahpa lâ hro pathipalôhrupa liata Krista pabeisana kyh kha a châ. Cha tlai cha Zisu Krista mission liamarihpa eima tahpa he a châ.

### **REIPAHMAOHNA**

- 1) Zisu Krista Mission liamarihpa cha pathipalôhrupa liata Zisu Krista pabeisana he a châ tah pi ta, Zisu ngiapâtuhpazy pi ta khâpa liata pabeisa via pi ta, khâpa liata e eima pabeisa khai thei vei tahpa a y tlyma?
- 2) Nama Local Church liata Zisu ma a bei via? Pastor ma? Hyutuhpa ma? VCP-pa ma? Local Committee ma? Local OB ma? VC Committee ma?
- 3) Zisu Krista pabeisa via nawpa ta Awnanopa sahlao ta kheita eimâ tyudua aw tly? Na pachâna rei tua mah y!

<p style="text-align: center;"><b>23 SEPTEMBER 2023</b> <b>SATURDAY</b></p>
---------------------------------------------------------------------------------

## DYCHHIEPAZY LÂTA THÂTIHPHA CHHONA

*Kyh na chhi tita cha dyhchhiepany, pihpasipazy, pheisypazy, mochaopazy, tlaohrua mah y, "Khazohpa Khinarâh liata pati a nie awpa cha a nohlaona" (Luka 14:13,15).*

Dyhchhiepa tahpa he Krika reih ta Ptochos (*pataawkhaws*) tah ei ta, he hawrawh he Luka ta ei 10 hmâh ta, Mathai nata Maka ta ei 5 chyu ama hmâh hra. Chavâta Luka mission bietâpa cha 'Zisu he dyhchhiepany hnabeiseihpa Thâtihpha a châ' tahpa ta reipa a châ.

Khinarâh Thâtihpha a chho hraba Bâtituhipa Zawhana ama patu haw tawhna khata Zisu cha Kalali râh liata alaiseihna khih Nazari lâta a kua haw. Pahânoh liata ama khih liata amâ pakhy tyhna Damazon (synagogue=sinakaw) liana chata dyhchhiepany lâta Thâtihpha chho awpa ta Khazohpa Thlahpa ta a tuapa a châna kyh thlai a rei pathaopa a châ.

Cha tawhta pathaopa ta sipasapa nata nodipazy cha viachhâ nata ngasa ta nie awpa pie ei ta, chiehleipa hluhpi cha patlâhsa ta, mochaopazy mo pavâsapa ta y ta, pheisypazy phei ta sie haw ei ta, reih pathlie theileipazy bie reih thei haw ei ta, nahpâpazy nah a pavâ haw. Aphawhpazy pathaipa ta y ei ta, ahripa ta apatu hawpazy chhao cha ama chhoh tawh papuapa ta a patlâh lymâ eipa kyh he Luka ta ahluhpi a palâsapa a châ.

He liata ahripa ta a patu hawpazy kyh he he hawhta a châ. Kôzabi eikhana rachhôn liata chyhsazy khithlâh hro, a eih pachai ta Zunawh hro liata a y hlüh ngâsâpa a châ. Ama dyhchhie sipasa tu ngâsâpa vâta ato khoh ei ta, ato uava ei ta, palôhrupa khopasana ama hneipa liata ahripa raihria ama chhôn liata angia hawpa kyh kha a châ. Eima hnôhlâ viano Marapa eima riethei sipasa ngaitana, eima râzoh ngaitana daihti liata chyhsa pakha atlâhleina liata ahmawhna akia haw e ama tahpa hawhpa kha a châ thlyu aw.

Luka châbu he ta Zisu chakaona liata sipasapazy kyh hlupî a palâsa. A eih pachai ta, Zisu bie pachuna liata dyhchhie sipasapazy tahpa he hmia a pasapa ei 4 lâ taihta pahnopa a châ. Dyhchhie sipasapazy kyh reina liana heta Mathai nata Luka ta ama reizie a lyu-âh vei. Mathai ta cha Zisu tlâhchô pachuna liata thlahpa liata sipasana kyh a reipa ta palâsa ta, Luka ta cha Zisu râphyu liata a pachuna liata sapa sipasana kyh a reipa ta a palâsa. Mathai liata tlâhchô pachuna bie he cha thlahpa palôhru ta novâh awpa chi châ ta, Luka liata râphyu pachuna bie deikua he cha kha daihtino liata hro amâ tyh ngâlâ haipa dyhchhie siepasana duasu tawhta aduapa ta a pathaopa a châ. A bie liata “Nâmo atahmâ ta,” tahpa he ei 4 a rei chaneipa a châ (Luka 6:20-25). Chavâta Luka châbu liata a reipa cha sapa pahla-dyhchhiena nata thlahpa sipasana kyh miano apakaohpa ta areih tahpa ta pahno theipa a châ.

Cha vâna chata he dyhchhie-sipasana kyh he sapa dyhchhie sipasana, sapa chiehlei-tlâhleina nata thlahpa lâ ngiapâ leina zy tahpa ta, he mia 3 kyh he Zisu ta a rei khohpa a châpa ta pahno theipa a châ. He kyhzy nata â zaopa ta Zisu ta

hneirôhpa nata Lazara kyh pakhona bie ta areipa a châ. Atanoh sapa liata dyhchhie sipasa kaw hr'ei sila, eimâ ngiapâ khihta cha Paw Khazohpa kala chhôn liata a hneirôhna zydua he eimâ hly thei cheingei aw. Atanoh hneirôh ngaita hr'ei sila, eimâ ngiapâ vei khihta cha Paw Khazohpa kala chhôn liata a hneirôhna zydua ky khaipa ta tlyzaw riethei pasana tiao eima to cheingei aw tahpa he a châ.

Zisu ta Ano pôhpa cheingei ta Paw kala chhôn liata hneirôhna ryuto cha atolâtuha eima châ hra n'awpa ta riethei sipasana a vaw tlyh ta, aluh nyu nawpa dêdei chhao hneileina taihta nata hrona apahleina taihta sipasa taolana a vaw taopa kha a châ. Bâtituha Zawhana ta a pachupazy cha vaw tuah ta “a vy awpa ama tahpa cha na châ ma? Chyhsa hropa eima hâ khao aw ma? tahpa ta a vaw pahiahrisa ngâlâpa kha a châ. Cha nota Zisu ta âchhupa cha “Kua ula, hmo nama hmôpa nata nama theipazy he Zawhana va chho teh u; “Mochaopazy ama hmô haw, pheisypazy ama sie thei haw, aphawhpazy pathaih ei ta, nahpâpazy nah pavâ ta, athipazy pathyupa ta y ei ta, dyhchhiepazy hnohta Thâtihpha chhopa a châ haw” tahpa ta âchhy eipa a châ. Chavâta dyhchhie sipasapazy lâta Thâtihpha chhotuha he Zisu Krista he châ ta, cha Thâtihpha chhao cha Zisu Krista Ano pôhpa tiai he a châ. Zisu hnei leina he dyhchhie sipasana thabya châ ta, Zisu hneina he hneirôhna hmeiseihpa a châ. Cha vâna chata Zisu ahneileipazy lâta Zisu Thâtihpha chho ta, pahneirôhsa awpa he Thlahpa Pathaihpa atopa Awnanopa sahlao ta a taolei theilei awpa, taovyuh rônah ngâsâpa a châ.



**REIPAHMAOHNA**

- 1) Thlahpa sipasapazy lâta Thâtihipha he khâpa e a châ aw tly?
- 2) Sapa lia dyhchhie sipasapazy lâta chho awpa Thâtihipha he khâpa e a châ aw?
- 3) Atanoh Mara Awnanopa ta eima dyhchhie sipasa kawpa he Thâtihipha vâta ma? Chyhsa vâta ma? Sawhkhâ vâta ma? Na pachâna dâh rei tua mah y!

<b>24 SEPTEMBER 2023</b> <b>SUNDAY</b>
-------------------------------------------

## ZISU KRISTA RAI PIE RÔNAHPA

*Chatawcha ama hnohta, “Khizaw zydua liata sie ula, hmotaopa zydua hnohna chata Thâtihpha he chho teh u” tah ta (Maka 16:15).*

He bie liata ABeipa Zisu ta a pachupazy rai apiepa ei he khâpa rai e a châ? A palalao leipa ta eimâ chhy awpa cha “Thâtihpha chhona rai” a châ eima tah aw. Khataih taih e ama chho aw? Âhnia ma? Âhla ma? A râh kawh ma? Abuah ma? Achhyna cha “Khizaw zydua liata” sie lai ta, chho lai lymâ awpa a châ. Khâpa hnohta e chho awpa? Ahyzy hnohta e? Achhyna cha “hmotaopa to zydua hnohta” chho awpa a châ. Chavâta a râh kawh ngâsâ ta, rai piepa chhao he raihria rônah ngaitapa a châ.

He rai rônahpa a pietheituhpa he kheihawhpa chyhsa e a châ? Kha tluta bie hneipa e? Thâtihpha Mathai rotuhpa ta achhyna cha “Aleï nata avâ liata bieheina zydua Paw ta a piepa, thina tawhta athyueituhpa Krista Zisu ta a châ. Cha raihria cha kheita e ama hria aw? Achhyna cha “chyhsa chi to pho to zydua kha pachupazy ta ama tao aw. Paw nata Sawchapawpa nata Thlahpa Pathaihpa moh ta bâti ama pachâsa aw. A biepiepa zydua kha avaopa ta ama pachu lai aw. Ano chhao ta a Thlahpa Pathaihpa ta a pahlaopa ta ama

hnohta tlyzaw ta a ypâ lymâ thlâhâ aw ei. Khizaw chhâna taih chhao ta” a ypâ aw ei tahpa ta a châ (Mathai 28:19-20).

He bie nata â zaopa ta Luka reizie cha he hawhta a châ. “He hawna heta ropa a châ. Messiah chata riethei tao aw ta, noh thoh nohta athipa hry tawhtapa thyuheih aw ta, Ano moh ta rona kyh nata molei ngiathaina kyh Zerusale kih liata pathaopa ta, pho to hnohta ma chho aw” (Luka 24:26-27) tahpa ta a châ. He liata Luka ta khâpa e ama tao aw? tahpa a reipa cha, rona kyh nata molei ngiathaina kyh ama chho aw a tahpa a châ.

Khataih lâ e kheita ama chho aw? tahpa he Luka ta Hmotaopazy châbu liata he hawhta a reih. “Thlahpa Pathaihpa ama chô liata a vaw tlô tua aw. Cha tawhta hmotaotheina ama hnei aw. Zerusale liata biechhona ama pathao aw. Zudia râh liata nata Samari râh khito liata angiapa ta ama chho aw. Khizaw kaoki taihta abie chhopa ta amâ châhkhei aw” tahpa he a châ (Hmotaopazy 1:8).

Chavâta he rai pie rônahpa he alei liata piepa chi châ leipa ta chôlâ avâ biehneina tawhta Thlahpa Pathaihpa hmotaotheina chhao ta piepa a châ. Alei liata sapa nata thlahpa lâ liata chyhsapa palôhrupa nata khitlâh hro pananosana nata taopathina raihria ta a châ. Avâ tawhta alei lâta Khazohpa Khinarâh patlôsana nata avâ mo ama taopa hawhta alei mo pataosa hrana raihria ta a châ. Cha raihria cha Thâtihpha chhona mission raihria he a châ. Thâtih chhiepa zy, thâtih ngiaryh chhih leipazy, thâtih buabapazy chho awpa châ leipa ta, thâtih ngiaryh chhih ngâsâpa, apahnieh tlâhpa, hrokhei tlâhpa, hnabeiseih tlâhpa tah a châpa sapa nata thlahpa lâ

ngiapâna palôhrupa nata khitlâh hro hmahsiena nata thlalôhna Thâtihpha he bie nata hmotaona ta palâsapa ta chho laih awpa ta a châ.

Pakhona ta, atanoh Mara Awnanopa mission rai pie rônahpa eima hriana liata eima hlaotloh khei kawpa ta pahnopâ miakhâ cha pachuna raihria he a châ. ABeipa baona vâta saku eima vaw taolaihpâ zydua kha atanoh cha Sawhkhâ saku phapa lâta a vaw lie khai haw bâ (*Myo field nata Laytu field lâ liata deikua cha a hluhpi hria via awpa a y chy*). Cha liata a vaw chupazy tawhta athaipazy vaw pua hôlô ei ta, ama râh paduakheitupâ pastor nata Sawhkhâ raihria liata ngâchhihpâ sawzy ta ama vaw châ haw bâ. Mochaopazy mo pavâsana mission raihria hlaotlohna ta a châ.

He rai pie rônahpa kyh nata â zaopa ta Zawhana reizie tawhta atanoh taih Awnanopa ta a vaw hmâ lymâpa ta cha he hawhta a châ. Zawpakho pati hnôhchaipa ama dona Makanô ochhôhpadâhpâ liata Zisu ta pachupazy châta, Paw lâta vaitupâ thlahchhâ achhâna liata a reizie ta cha “Nâma ta khizaw liata kei eina tuapa hawna chi khata, kei chhaota âmo cha khizaw liata ei tua ei hi” (Zawhana 17:18) a tah.

Zisu thi ta athyueih khai tawhta he a thlahchhâna su Makanô-o chhôhpadâhpâ lia cheingei heta a rei chanei heihzie cha he hawhta a châ. “Nama chô liata thlalôhna y mawh sy! Paw ta kei eina tuapa hawh hrata, ei cha tua ei hi” (Zawhana 20:21) tahpa ta a châ. Cha rai piena liata bie a pataihpâpa cha “Thlahpa Pathaihpâ hnei teh u. Ahy moleipa rai namâ ngiathaipa maih, angiathaipa a châ aw; ahy moleipa rai namâ ngiathai leipa maih, angiathai leipa a châ aw” tahpa he a châ.

Cha cha kyhpachâna raihria liamarihpa a châpa ta Zawhana châ paphaopa ta a reih. Achhâpa cha Khazohpa cha kyhpachâna a châpa vâta a châ (1Zawhana 4;9-10).

Chavâta he rai pie rônahpa mission raihria he athi aphih haipa liata kyhpachâna raihria awpa ta a châ hawpa vâta nata rai piepa chhao he alei nata avâ hmotaotheina zydua ahneipa biehneituhpa tawhta piepa raihria a châ hawpa vâta eithai awpa nata atysai thai awpa chi châ chachei vei tahpa he liata ahno ngâsâpa a châ. Cha chata miah a chhopasiapa cha mission raihria he cha mylâ va, hanoh va, ama tahpa chi châ vei. Meikâ tilaipa raihria ta a châ. Mission châta lâ mylâ hanoh ei vaw phasa via tawhta na ei vaw hria laih aw tahpa he cha o meikâ haipa liata mylâ hanoh pachhai la vapi e tahpa nata âlyu. Ti ta aphao haipa viasa hnohta mylâ hanoh balyh zy ei vaw chalei thei tawhta cha vaw pachha laih lava nei e tahpa nata alyupa a châ. Lyu liata sâh hmôpa amaih pha lichih, hria a su lichih nota hria chatlie awpa chi ta a châ.

## REIPAHMAOHNA

- 1) Mission raihria he ABeipa Zisu rai pie rônah ngaitapa a châ. Nâma zaw a chapiepa ta nâ pahno ma? Kheita e na hria hai tly? Nâ lykhei ma? Nâ ngiapachhikhei ma?
- 2) He rai pie rônahpa lia heta pachuna Mission raihria he eima hlaotloh viapa miakhâ hawhta a châ nota atanh taih eima phahla ngaita chyhpa cha patlâhna Mission raihria he a châ. Kheita eima tao khiah, a pha via aw tly?

<b>25 SEPTEMBER 2023</b> <b>MONDAY</b>
-------------------------------------------

## SYPNOTIC THÂTIHPHA MISSION

*Nochhi nata notla, maw nata chho lâ tawhta chyhsa a vy aw ei ta, Khazohpa Khinarâh liata a ma vaw tyuh aw. Hnôh chaipazy chhao hmia chaipa ta a y awpa y ei ta, hmia chaipazy chhao hnôh chaipa ta a y awpa a ma y' tah ta (Luka 13:29-30).*

Sypnotic tahpa hawrawh he Krika hawrawh Synonyms (sinonim) tahpa tawhta lapa châ ta a yzie cha 'alyupa' tahna a châ. He liata a rei khozpa cha Thâtihpha châbu, Mathai, Maka, Luka zy he 'pizie alyupa Thâtihpha châbu' a châ tahpa he a châ. He Thâtihpha châbu mia 3 zy ta amâ lyuna thabya cha Zisu Thâtihpha mission he Khazohpa Khinarâh kyh a châ tahpa liana heta amâ lyuna a châ.

Zisu pachuna biezy, pakhona biezy nata Khazohpa Khinarâh âhnia haw ta, Khazohpa kyhpachâ ngiachhiena to thei n'awpa ta cha ro awpa âbyuhziezy he a Thâtihpha mission cha a châ. He liata bie liamarihpa cha Zisu Krista he Khazohpa Khinarâh tawhta piepa ngiachhiena hmosai sohpa ta a châzie a palâsapa he a châ. Cha Zisu Krista kyh ama reina style deikua ama hnei chyupa ta a lâ.

Mathai ta cha Zisu he, Biehrai Parohpa liata hrosophazy bie vaw rei chhielie hawpa Khazohpa Messiah kha a châ tahpa âduakhei. Biehrai Parohpa hnabeiseihpa cha Messiah pachhana he avâ tawhta ararôh y ngâsâpa ta a vaw tlâ awpa

hawhta a pachâ. Châhrasala Biehrai Thiehpa liata cha cha hawhta châ khao leipa ta chyhsa hawhta vaw pihpa ta sei ta a vaw tao thlâhâpa a châ. Cha cha Ano sasyh ta achâna apalâsanazie tawhta pahno theipa a châ. Miakhâna liata cha Daniel 7:13 bie hawhta “Chyhsa Sawchapawpa” tahpa ta a moh ta a palâsa ta, mianona liata cha Isai 42:1-4 lia aduapa ta “Chakaotuhpa” tahpa ta a hmotaio raihriana ta a palâsa ta, miathôhna ta cha Hlazy 110 lia aduapa ta abeina nata a ryureina chhâna hnei leipa Davi Sawchapawpa abei ta a châpa ta a palâsa. Chavâta Mathai Thâtihpha mission cha Zisu bie piepa zydua he khâ cha a vao ta, sie ta pachu laih awpa he a châ (Mathai 28:20). Biehrai bie, Zisu Thâtihpha bie ta he a vao laih ta, sie laih ta, pachu laih awpa he a châ.

Maka ta cha Zisu he mohropa châta sei ta atao ta, ahro apahleipa a châ a tah. Zisu Krista Khazohpa Saw, Messiah châna he Maka ta cha athina, thyuheihna nata vâ lâ kiana lia heta ahnopa ta a palâsa. A bie pachuna, ryhpa a chhopasiana, chiehleipa a patlâhsana hmotaiotheinazy chhao he a Messiah châna ahnona ta a palâsa hra. Châhrasala Zisu châna hmeiseihpa cha mohropa châta sei hawhta a taopa ta, chyhsa hluhpi pachhana awpa ta hrona nata pôhpa apiena taihta a reingiana he a châ. Zisu ta Ano sasyh a pahnosana chhao cha “Chyhsa sawchapawpa he chakaopa awpa ta a zu vei, chakaotuhpa ta y awpa nata chyhsa hluhpi chatlaina awpa ta a hrona pie awpa ta a zupa a châ” (Maka 10:45) tahpa ta a palâsapa a châ. Chavâta Maka Thâtihpha mission cha mohropa hro n’awpa, pha n’awpa châta riethei taona ta hro apiena he a

châ. Hrozie nôchâ nata hmotaona ta a chakaona ta Messiah a châpa a palâsana he a châ.

Luka ta cha Zisu he vâtlâh lâta pachhana a vaw tlôkheipa a châ a tah. Kaokha lâta eima rei khiakta cha Zisu Krista he dyhchhie sipasapazy pachhana Thâtihipha a châ tahpa he a châ. He kyh nata â zaopa ta eima vaw chu chiehpâ Mission yzie liata nata dyhchhiepazy châta Thâtihipha tahpa liana khata varo eima vaw rei hawpa kha a châ hra. Luka liata Zisu Ano sasyh vâtlâh Thâtihipha a châpa a palâsana cha khiliah-râpah chyhsazy akao ta, chiehleipazy apahlao ta, sihryhpa moleipa nata chhiekheituhpazy a viasana liana heta vâtlâh chyhsa a châna ahno ngâsâpa ta a palâhahpa a châ. Chavâta Luka Thâtihipha mission cha chyhsa nawhpazy viasa châna he a châ. Nochhi Mara MTP bievaopa (Motto) “Chiehleipazy viasa” tahpa he Luka Thâtihipha mission nata ahmie ngâsâpa a châ.

Cha vâna chata sypnotic Thâtihipha mission cha ‘Zisu pôhpa, a moh, a bie pachupa, a hmotao raihriazie, Ano sasyh apalâsanazie nata hro apienazie zydua he Ano phasana châta dikhâta chhao châ leipa ta Ano vâta khizaw pho to chi to reih to zydua ahyrai angiapâpa maih pachhapa ta ama y thei nawpa he a châ. He heta miah achhopa Thâtihipha cha Mission raihria he athôhna raihria châ leipa ta thapasapa ta a pakyna raihria a châ tahpa hi. A pachôna châ leipa ta a pahryuna a châ. Eimâ thôhna cha avâ Khazohpa liata pachôpa ta a y hri aw.



**REIPAHMAOHNA**

- 1) Sypnotic Thâtihpha Mission liata ama reinazie na khoh viapa ahy eih he ma tahpa rei teh! Khâpa vâta e?
- 2) Zisu nata Apostol-zy khata ama hro apatlokhaina taihta riethi sipasa ngaitapa ta Mission raihria ama vaw chakao khai hawpa a châ. Atanoh Mission a chakaopa Awnanopa nata Misawnarizy thokha sipasa ngaitapa ta âhnalasizy zuapa ta y ei ta, thokha hneirôh ngaitapa ta Concrete-ozy tlopa ta Mawtaw (Motor) zy taih ama hnei the heih hi. Khâpa vâta e a châ aw tly?

<b>26 SEPTEMBER 2023</b> <b>TUESDAY</b>
--------------------------------------------

## AWNANO HMIATUAPAZY MISSION CHAKAONA

*Châhrasala Ano hmeiseihna Thlahpa cha a vaw tlô tita, bie hmeiseihpa zydua liana cha a chachhi aw ei (Zawhana 16:13).*

Thlahpa Pathaihpa raihria tawhna heta Krizyhpaw Awnanopa tahpa nata Mission chakaona tahpa he a vaw duah pakaoh hawpa a châ. A vaw dua tuana liata pizie mia 5 he thlai a vaw duakhei chalâh hawpa a châ hra. Chazy cha;

1. Achhyna; Khazohpa ahrohpa pakha deita achhy awpa
2. Pachuna; Khazohpa bie he a pachupa ta, achu lymâ awpa
3. Akaona; Ngiapâtuhpazy akaona pathaihpa ta akao lymâ awpa
4. Chakaona; Khazohpa raihria pathaihpa he chakao lymâ awpa
5. Thâtihpha chhona; A pachhana Thâtihpha he khizaw zydua liata chho lymâ awpazy he a châ.

Hmiatua Awnanopa he a vaw duapa ta nata he a chô liata pizie mia 5 he thlai a vaw duakhei chalâh hawpa a châ. He tlai he Awnanopa pizie rai ta a châ lymâ awpa chhao a châ. A pizie lia rai ta Awnanopa cha thlahpa thapasana ahnei ngaitapa, misawnari Awnanopa ta thlai a vaw duah chalâh hawpa a châ.

Awnanopa cha Khazohpa paduapa Izarei thiehpa a châ. Awnanopa cha Khazohpa theithaipa ngâchhihpa a châ.

Awnanopa cha a pathaih ngâsâpa a châ. Awnanopa cha mo pathaihpaazy akaona a châ. Awnanopa cha chatlaipa sawzy y pakhyna a châ. Awnanopa sahlaozy y pakhyna su he molei ngiathaina su a châ.

Awnanopa paduana liata Khazoh hmochhuahpa mission chakaona raihria mia (6) zy cha he hawhta a châ.

1. Awnanopa cha zohna tawhta khaihna pietuhpa Khazohpa phana kyh palâsa lymâ awpa.
2. Awnanopa cha Zisu Krista liata hmotaotiehpâ a châzie palâsa lymâ awpa.
3. Awnanopa cha Krista pôhpa a châzie palâsa lymâ awpa.
4. Awnanopa cha Thlahpa Pathaihpa pahrâna-o a châzie palâsa lymâ awpa.
5. Awnanopa cha Thlahpa Pathaihpa ta paduapa a châzie palâsa lymâ awpa.
6. Awnanopa cha Krista bie a pahnotuhpa a châzie palâsa lymâ awpa.

Cha vâna chata Awnanopa he Zerusale liata Pentecost noh ta Thlahpa Pathaihpa piepa ta paduapa a châ awpa zie he Bei Zisu ta vâ lâ a kia chyta liata a sia ngâsâpa ta a vaw rei chhielie hawpa a châ.

A reinazie cha;

1. Thlahpa Pathaihpa cha nama chô ta a vaw tlô aw,
2. Cha tina chata hmotaotiehpâ nama hnei aw,
3. Zerusale tawhta pathaopa ta kaoki taihta ei bie a pahnotuhpaazy nama châ aw (Hmotaopazy 1:8) tahpa ta a châ.

Pentecost nota Thlahpa Pathaihpa chata china, riachhiena ta a bie thlâ haw pa Apostol mo 11 nata pachupa sahlaozy kha hmotaotheina ta pabipâ khaipa ama châ. Amozy khata Zisu thina thyuheihna nata pachhana Thâtihpha kha, a y môlô khei thei khao leipa Awnanopa ta a tao syulyu haw ei. Apostol-zy he ta riahpha ngaitapa ta Thâtihpha cha chho lymâ ei ta, ngiapâtuhpazy ta ama hmo hneipazy zuapa ta Apostol-zy phei thaby liata ama vaw soh lymâ. Patunazy, pachhiparynazy, taolana riethei pataosanazy, chheinazy, nielei doleina liata zy, sahraha pakah liata zy, chamaih zy taihta chi leipa ei ta, thina taih chhao ta Thâtihpha vâta mâty châpa ta ama hrona ama vaw hmâh patlô khai hawpa kha a châ.

Chavâta Thlahpa Pathaihpa piepa ta paduapa Awnanopa cha Thlahpa thapasana ta a bie cheingei awpa a châ. Thlahpa thapasana thei cha mission chakaona chata riaphana nata riahphana he a châ. Mission thapasana ahnei leipa Awnanopa cha Thlahpa Pathaihpa a hnei khao leipa vâta Awnanopa thiruapa tla a châ aw. He vâna heta Awnanopa heta thlahpa lâ hro pahrana, thapatlôna he aleithei leipa ta a tei lymâ cheingei awpa a châ.

## REIPAHMAOHNA

- 1) Awnanopa pizie (5) pa he nama Local Church liata âtlakhâpa ta nama hnei pazao lymâ theipa ta na pahno ma?
- 2) Awnanopa paduana liata Mission chakaona raihria mia (6) pa hry liana heta nâma ta na palâsa via chai tyhpazy rei teh!

<b>27 SEPTEMBER 2023</b> <b>WEDNESDAY</b>
----------------------------------------------

## LYUCHÂPA PAWLA MISSION BIETÂPA

*Zu nata Krika mozy khâpa lia hmahta anano hlei tloh leipa ei ta; ABeipa pakha ama zydua chôta ABeipa châta a padotuhpa maih chô liana chata phana hnei ngaita tloh ta (Rawma mozy 10:12).*

Biehrai Parohpa liata hrosohpazy ta mission bietâpa ama rei chyupa hawhta Biehrai Thiehpalyuchâpazy chhao ta mission bietâpa he ama rei chyuhrapa ta pahnop a châ. Lyuchâpa Pawla mission bietâ liamarihpacha “Zisu Krista he mo to Abeipa a châ” tahpa nata “Zisu pachhana he Khazohpa ngiachhiena hmosai piepa a châ” tahpazy he a châ.

### **ABeipa Zisu he mo to Abeipa a châna kyh liata;**

ABeipa Zisu he Zuzy beipa a châ awpa rai ta a khoh thairahra-hro leipa Pharisaih pachaipa Rabbai Sawla he Damasaka hawkaw liata Thlahpa Pathaihpahmotaotheina ta Zisu Krista a vaw tyh rakha tawhna khata cha Zisu Krista he Zuzy Beipa dei châ leipa ta, mo to Abeipa a châpa kyh a siapa ta a vaw pahno haw. Cha noh tawhta Zisu pachhana cha Zuzy tawhta pathaopa ta Zenitai zydua châta a châzie kha riahpha ngaitapa ta a châhkhei lymâpa a châ.

Lyuchâpa Pawla ta “Atahmâ ryhpa nata hrosohpazy pahnosapa hawhta ryhpa-leipa ta Khazohpa siana cha paluhsapa ta a y haw; cha cha Khazohpa siana Zisu Krista

ngiapâpa vâta a ngiapâpa maih hnohta paluahsapa ta a ypa cha a châ, a nanona rai y vei” (Rawma 3:21-22) tahpa ta Rawma Awnanopa hnohta a vaw reih. Lyuchâpa Pawla ta Krista Zisu liata Khazohpa pachhana kyh a palâsana hawrawh eihrahpazy cha he hawhta a châ.

1. Khazohpa khonazie cha pathaih awpa a châna kyh (1 Thysalawnika 4:3)
2. Khazohpa ta a hiehana pasatao awpa ta châ leipa ta, Zisu Krista zawhzi ta pachhana tlaô hmô awpa ta maniah a raona kyh (Thysalawnika 5:9).
3. Khazohpa Awnanopa cha Krista Zisu liata mopathaih pazy cha awpa ta aw-pakhypa eima châna kyh (1Kawrini 1:2) zy he a châ.

Lyuchâpa Pawla heta, Zisu Krista heta khâpa hmo e a tao? tahpa hlâta Zisu he ahy e a châ? tahpa he tlaô a palâsa viapa a châ. ABeipa Zisu he Khazohpa sathaw thupa Messiah a châ tahpa he Pawla mission châhbi ta a châ. “Cha a Sawchapawpa, eima Beipa Zisu Krista thâtih chata a sapa kyh lâta cha Davi pathla ta a piha châ ta; a thlahpa pathaihna kyh lâta deikua a thihpa hry tawhta a thyuheihna châ ta, Ano cha Khazohpa Sawchapawpa a chânazie thata palâsa ta” (Rawma 1:3-4) tahpa ta a reih.

### **ABeipa Zisu he a pachhana kyh liata;**

Zisu Krista pachhana kyh nata â zaopa ta lyuchâpa Pawla ta cha, Zisu Krista pachhana he Khazohpa ngiachhiena hmosai piepa pachhana a châpa ta a reih. “Cha a ngiapâtuhpazy cha Krista Zisu chatlaina a ypa vâna chata, a ngiachhiena ta a saipa ta thai pachâsapa ta y ei ta” (Rawma

3:24) tahpa ta a reih. Zisu Krista liata panano eihpa y leipa ta mo to thai pachâsapa a châna kyh he a reikhohpa cha a châ. “Zu nata Krika mozy khâpa lia hmahta a nanona y vei” (Rawma 10:12) a tahpa kha a châ.

“Zisu Krista liata ngiapâna vâta Khazohpa sawzy châ khai tloh ei chi ta, nama hry ta Krista liata bâti a châpa maih kha, Krista châta abu haw tloh ei chi ta. Cha liana chata Zu chyhsa y hlei leipa ta, Krika chyhsa chhao y hlei hra vei. Cha liana chata sei y hlei leipa ta, sei leipa chhao y hlei hra vei, cha liana chata chapaw nata chanô chhao y hlei hra vei, Krista Zisu liana chata nama zydua ta pôhkha châ tloh ei chi ta” (Kalatia 3:26-28) tahpa ta Zisu he ahy eih via pachaipa châ hlei leipa ta, ahyrai angiapâpa maih châta Abeipa nata pachhatuhpa, Khazohpa hmosai piepa a châna kyh he lyuchâpa Pawla mission bietâpa cha a châ.

## REIPAHMAOHNA

- 1) Na palôhru chhoh chaipa liata Zisu he nâma châta “ABEIPA” ta ma na pachâ via, Pachhatuhpa ta ma? Khâpa vâta e?
- 2) Lyuchâpa Pawla ta cha Zisu he khâpa hmo e a tao tahpa hlâta ahy e tahpa he a palâsa khoh viapa a châ. Nâma zaw kheita e na pachâ?

<p style="text-align: center;"><b>28 SEPTEMBER 2023</b> <b>THURSDAY</b></p>
---------------------------------------------------------------------------------

## LYUCHÂPA ZAMI MISSION BIETÂPA

*Thlahpa a hlao leipa pôhpa cha a thipa a châ, chahawhna hra chata hmotaona a hlao leipa ngiapâna cha a thipa a châ (Zami 2:26).*

Lyuchâpa Zami châbu he “Awnano hmiatuapa liata hrosohpa ao” tahpa ta moh bipa a châ. Hmiatua Awnanopa sahlaozy lâta Krizyhna hro pasyupakana châbu ta a châ. A hmochhuahpa cha ‘Krizyhpah sahlaozy a ngiapâna cha ama hmotaopa liata atheisuh âlâ awpa na a châ’ tahpa he a châ. Bie deita châ leipa ta hmotaona ta Krizyhpah sahlaozy pita a deichhy ta, thlah a palôh raihrie awpa na a châ e tahpa he âchhuahna nata a reikhoh chaina ta a châ. Justice

Lyuchâpa Zami he khitlâh hro atlakhana (social justice) aduakheipa chyhsa ngâchhihpa pakha ta a châ. Mawsi châbu nata hrosohpazy châbu liata zikyurâna biezy he khitlâh hro atlakhana mission a châpa ta palâsa âchhuah chaipa a châ. Hneirôhpa nata sipasapa likawh azaona saikao chiepadahna kyh he a palâsa khoh. Hneirôhpa chhao he sibipa paw hawhta a lothei uah theipa ama châ. Sipasana chhao he movi hlâ riethaina deita a châ. Chavâta Awnanopa sahlaozy liata hmo a pachâsa khohpa cha ngiapâtuhpah ahyrai ta cha raihria tiamapa, sasyh a deichhy theipa a ma châ chyu awpa na a châ a tah. Ngiapâtuhpah ta thathi awpa châ vei. Ngiapâ thatlôna cha



mohropa châta a lo papuana liata a theisuh âlâpasia awpa a châ. Cha ngiapâna lo papuana cha mission chakaona he a châ tahpa he a bietâpa ta a châ.

Awnanopa liata cha a pa-eihrahna, dyhchhie dyhpha a pa-eih pahrahna, a pathlua-pachhahna duahmo hpz... he eima palâsa awpa châ leipa ta, a y rai ta a y awpa châ hra vei. Eima zydua ta Krista liata miakhâ pôhkha sai eima châ. Krista liata unawh sietanôzy sai ta eima châ. Cha tlai cha lyuchâpa Pawla chhao ta a rei nailaih haithapa bie a châ (Kalatia 3:28; Ephesi 2:14-16). Khitlâh hro a tlakhah leina, dyhchhie sipasa a pa-eihpahrahna duahmo he moleina a châ tahpa he lyuchâpa Zami ta âduakheipa a châ (Zami 2:9). Krizyha Awnanopa ngiapâtuha ta cha 'kyhpachâna ryha' he ama noh to hro lia ama hmâ cheingei awpa ta a châ (Zami 2:8) a tah. Cha kyhpachâna ryha cha kheitha e a yzie a châ tahpa chhao Abeipa Zisu ta Samari chyhsa phapa kyh (Luka 10:25-37) liata nata ryureituhpa thyutlia hneirôhpa kyh (Luka 18:18-22) liata zy ta pakhona pha ngâsâpa ta a reipasiapa hpz... kha a châ.

Awnanopa mission chakaona su liata chhochhi cha he hawhpa khitlâh hro liata a pathlua-pa eihna duahmozy he Zenitaizy hry liata a y hlüh ngâsâpa a châ. Chavâta parih hawhta soh thai ngâsâpa ta nata vachhuh hawhta nonaipa ta pahno thai ngâsâ awpa âbyuh. Awnanopa chhao he baona ngala deita abôchhâpa, athathipa ta tao pathlei lei awpa ta nata ano kuphei tata raihriapa ta ano sasyh adua theipa ta pachu ta chhitha awpa a peimawh ngâsâ.

Atahmâ tawhta cha achhyna-o nata quarter hpz project hianazy chhao he profile ta liahsa palâsapa ta, amo tawhta

thazah khazie hnei ei ta ma khazie ta sponsor awpa âbyuh tahpa he asia ngâsâpa ta palâsapa ta tao bâ awpa ta a pha thlyu aw.

Chavâta lyuchâpa Zami mission bietâpa he cha Awnanopa he raihria tiamapa, hro atlakhâhna palôhphao ahneipa, lôraohpa ta akaopa, a tiamapa nata ano kuphei tata aduah theipa ta pachu awpa he a châtaw a châ via chaipa ta pahnopa a châ.

### **REIPAHMAOHNA**

- 1) Nama Awnanopa Local Church chhôn liata khitlâh hro atlakhâh leipa ta na hmôpazy reipapua tua mah y!
- 2) Awnanopa liata hro atlakhâh leina atlôkheituhpa he atlâhpipe ta khâpazy e a châ aw? Kheita tao sila e, eima padiah thei aw vaw tly?

**29 SEPTEMBER 2023**  
**FRIDAY**

## APOSTOL ZAWHANA MISSION BIETÂPA

*Châhrasala hezy he Zisu cha Krista Khazohpa Sawchapawpa a châ tahpa namâ ngiapâ nawpa nata a ngiapâpa ta a moh liata hro nama hnei nawpa ta ropa a châ (Zawhana 20:31).*

Apostol Zawhana mission bietâpa cha “Zisu Krista he Khazohpa Sawchapawpa a châ’ tahpa angiapâ maih ta Zisu moh ta hrona ama hnei aw” tahpa he a châ.

Zisu Krista he ahrohpa Khazohpa châna tawhta chyhsapa lâta a vaw pihpa a châ tahpa he a bietâpa a châ. Cha kyh cha Thâtihipha Zawhana ta he hawhta a vaw rei pathaopa a châ. “Athaona liata bie a y. Bie cha Khazohpa hnohta a y. Bie cha Khazohpa a châ. Ato zydua Ano zawhzi ta Khazohpa ta a tao. Bie liata hrona a y. Cha hrona cha chyhsazy khaihna a châ. Bie cha chyhsa hrohpa lâta a vaw lie ta, eima hry liata a pahrâ. A rônahna hmô haw pi ta, ngiachhiena nata hmeiseihna ta a bie. Cha rônahna cha Paw Sawchapawpa matlupa rônahna cha a châ” (Zawhana 1:1-14) tahpa ta a reih.

Zisu Krista liata, bie cha chyhsa hrohpa lâta a vaw liena zawhzi ta Ano angiapâtuha chyhsazy ta Ano (Krista) liana chata Khazohpa rônahna cha ama hmôpa a châ. Khazohpa rônahna ama hmôpa dei chhao châ leipa ta Khazohpa hmochhuahpa rônah ngaitapa “chhâzaw hrona” chhao ama to hra awpa a châ.

Khizaw he Khazohpa mission châtaw ta a châ. Khazohpa ta chyhsa hrohpa lâta a vaw liena cha Khazohpa ta chyhsa eima châna, eima chyhsana a pasozie nata chyhsapa kyh a pachazie palâsana a châ. Cha cha Khazohpa ta chyhsapa he Ano alyupa, Ano kakuapa tlaita miah atao hawpa vâna khata a châ.

Zisu Krista cha khizaw zydua pachhatuhpa a châ tahpa Zawhana ta he hawhta khizaw nata â zaopa ta a rei nailaih haithapa a châ. “He he khizaw Pachhatuhpa a châ” (Zawhana 4:42). “Khazohpa ta khizaw he kyhpachâ ngaita ta” (Zawhana 3:16). “Khazohpa mietakupa taw khizaw moleina a siekheituhpa” (Zawhana 1:29). “Khaihna hmeiseihpa, chyhsa to pakhaihsa awpa cha khizaw liata a zu” (Zawhana 1:9). “Kei khizaw khaihpa ei châ” (Zawhana 8:12). “Khizaw pachha awpa ta a vupa châ tloh na ta” (Zawhana 12:47). “Nâ ta kei eina tuah chi tahpa khizaw ta ama zo thei nawpa ta” (Zawhana 17:21) tahpa ta a reih lymâ.

Zawhana mission bietâpa ta a rei chaipa cha ‘pachhana he chyhsa to châta chyhsa to lâta piepa a châ’ tahpa he a châ. Anodeikua cha pachhana cha ahyrai Zisu Krista angiapâpa maih deita to awpa ta a châ. Cha vâna chata chyhsazy ta Zisu Krista ama vaw ngiapâ thei nawpa ta Zisu Krista pachhana Thâtihpha cha Awnanopa ta khizaw zydua liata siepa ta a chho cheingei awpa ta a châ tahpa he âchhuahna liamarihpa a châpa yzie ta hawhta Zisu ta “Paw ta kei eina tuapa hawh ta, kei ta khizaw lâta ei cha tua ei hi” (Zawhana 20:21) a tahpa a châ.

Zawhana ta cha ‘sapa chyhsazy ta ama hmô thei leipa, Khazohpa châna cha bie liata y ta, cha bie tlai cha chyhsazy ta

ama hmô thai, pahno thai thei nawpa châta chyhsa hrohpa, chyhsa sapa lâta a vaw lie thlâhâ ta, ahrona tlokhuh ahlâpa ta thina tawhta miah pachha papua ta tlyzaw hrona maniah a pie e. He khizaw zohna hry tawhta khaihna lâta maniah a chhitha papua e tahpa he a châ. Cha tlai cha Paw Khazohpa kyhpachâna cha a châ. Cha tlai cha Thâtihpha ama tahpa he a châ e. Cha Thâtihpha cha khizaw chyhsa ahyrai angiapâpa maih ta chhâzaw hrona cha ama to awpa a châ e' tahpa he Zawhana ta âduakhei haithapa mission bietâpa cha a châ.

### REIPAHMAOHNA

- 1) Zisu Krista liata Paw Khazohpa rônahna eima hmôpazy cha khâpazy e a châ aw?
- 2) Pachhana he ahyrai Zisu angiapâpa maih châta piepa a châ. Zisu angiapâ ta bâti chiehpazy hnohta pachha châ mâh va chi e tahpa ta bâti pachâsa pakhuah heihna kyh he nâma kheita e na hmôzie a châ?

<b>30 SEPTEMBER 2023</b> <b>SATURDAY</b>
---------------------------------------------

## MARA AWNANOPA MISSION CHAKAONA

*Khizaw khaihpa nama châ na. Tlâh laki liata khih a ypa cha nyu theipa châ vei (Mathai 5:14).*

Krizyhpâ Awnanopa mission chakaona he Pentecost Thlahpa Pathaihpâ pahrana tawhta pathaopa a châ tahpa kha eima vaw reih haw. Zerusalem tawhta pathaopa ta Apostol-zy nata hmiatua Awnanopa sahlaozy ta kaoki kipalih aheihpa ta Zisu Krista thina thyuheihna nata pachhana Thâtihpa cha a ma chho pathao.

1730-1740 likah ta Mongyu râh ahrana rônahpa heta mission thapasana thlahpa thata a vaw tlôkheipa a châ. Chatawhta mission chakaona chhao he a râh vaw kawh via syulyupa ta mission society-zy a vaw duah hôlô haw. Cha daihti tawhta kaoki kipalih liata misawnari hluhpi tuapa ama châ lymâ. Mara Awnanopa ta missionary eihpa eima vaw hnei chhôhpa chhao he cha ahrana theilâpa cha a vaw châ tah ei sila rei chhei thlyu aw mapi.

Marapa râh liata chhao Awnanopa a hrana hmiatua chaipa he 1934 kô ta Siaha khih liata a vaw tlô. Atheilâpa cha 1935-36 rachhôn liata Rev. Za-eih nata sahlao mo (4) zy ta atahmâ ta Myokhami (Vahko) field eima tahpa liana heta Vahko chyhsazy hnohta Thâtihpa chho ama vaw chakao pathao tua chai. Awnanopa tuapa châ veih ei. Âmo pôhkha

thapasana tata a siepa ama châ. Châhrasala khizaw a dyuhpi ei (2) na Japan chahriah vâta ama kaw kua pakhua haw tahpa a châ.

1957-58 Mararâh Thâtihpha Golden Jubilee rônahpa heta Mararâh pôhpa liata Awnanopa thlahpa lâ ahrana rônah ngâsâpa a vaw tlôkhei heih. He ahrana heta leidiapazy thapasana nata veina thata vaw tlôkhei ta, thlahpa thapasana ta mission chakao awpa ta mothlih tla ngâna taihta veina khâchâ ama vaw hnei haw. Cha tawhta 1963 kô LIEC (Lakher Independent Evangelical Church) Assembly, Amôbyuh ta mission chakaona raihria pathao awpa ta bie vaw pathlu ta, Mission Board Committee ama vaw padua. He Mission Committe heta azyh azyh ta hmah vaw la laih lymâ ta 1966 kô ta hriatuhpa vaw la ta, Khami râh liata a vaw tua pathao hawpa a châ. Missionary hmiatuhpa cha Evan. Khôsâ (Tôkalô) he a châ.

Mararâh Thâtihpha kô (50) na Golden Jubilee ahrana ta mission chakaona a vaw tlôkheipa heta Mara Awnanopa hrona liamarihpa a tao papua tah lei theipa châ vei. He raihria rônah ngaitapa hria awpa ta, Assembly ta Mission Committee vaw paduapa ta Headquarters liata chhao Mission department eiha vaw hneipa châ ta, Executive Secretary, Director nata missionary zy a vaw hnei chhih laiha a vaw châ.

Mara Awnanopa ta mission chakaona a vaw hneipa âchhuahnazy cha –

1. Awnanopa he missionary Awnanopa pachâsa lymâ awpa,

2. Awnanopa sahlao zydua ta mission a chakaopa ama châ khai thei awpa,
3. Awnanopa he mission chakaona liata âhra lymâ thei n'awpa ta pahra lymâ awpa,
4. Sie ta, thlahmih leidiapa, râzohpa chyhsa zydua pachha khai ha awpazy he a châ.

MEC Awnanopa chhao ta he a chô liata achhuahnazy hlao patloh thei n'awpa ta he ary lia hawhta rai a vaw hria lymâ.

Chazy cha;

- 1) Awnanopa pahrana
- 2) Thâtihipha chhona chakaona
- 3) Awnanopa paduana nata mohôhna
- 4) Pitlohpa ta taona (Pachuna, a chuna, patlâhna nata khitlâh hmahsiena)
- 5) Mission achakaopa Awnanopa pachâsa awpazy he a châ.  
*(Aly chhah kawpa miakhâ cha eima chakao haipa Laymyo Chin Awnanopa heta ama râh liata thlahpa lâ ahrana a vaw tlô khai tawhta mission thapasana thlahpa to hrapa ta mission board zy a vaw padua hra ei ta, chakaona a ma vaw pathao haw bâ hrapa he a châ).*

MEC mission chakaona châta biepipa, bievaopa (motto) cha *“Khizaw khaihpa nama châ na”* (Mathai 5:14) tahpa he a châ.

He a chô lia tahpa raihriazy hria papua thei nawpa ta Headquarters Office, Evangelism & Mission department tawhta raihria kaono ta pachhaihpa ta mission chakaona rai a vaw hria pazihpa lymâ.

Chazy cha;



1. Home Mission raihria (Evangelism) nata
2. Evangelical Mission Myanmar raihria (Mission) zy he a châ.

Chavâta he raihriana department moh chhao he Evangelism & Mission Department tahpa a châ.

### **Home Mission raihria zy cha -**

1. Awnanopa sahlaozy thlahpa lâ hro pahra lymâna
2. Awnanopa sahlaozy mission chakaona liata amâ hlao lymâ thei nawpa ta Thâtihpha bie ta pahrana nata thapatlô lymâna zy he a châ.

He raihriazy chakao awpa heta Assembly ta Home Evangelist mo pa (4) he term-kha ta eikha a vaw tlyh ta, chakaona ama vaw hnei pha lymâ. Part time Evangelist (Free Evangelist) tahpa ta biechhotuhpazy chhao Awnanopa liata eima vaw hnei lymâpa kha a châ.

### **Evangelical Mission raihriazy cha -**

1. Thlahmih leidiapazy hnohta Krista pachhana Thâtihpha chho awpa
2. A vaw ngiapâ thiehpazy bâti pachâsa ta, mohôh ta Awnano padua awpa
3. Awnanopa sahlaozy sapa nata thlahpa liata ama hmahsie lymâ thei nawpa ta pachuna, a chuna nata mohôh awpa zy he a châ.

Atahmâ nota cha he Evangelical Mission Myanmar raihriazy chakao awpa ta Mission Director a vaona ry liata missionary mo pa (18) nata a râh chyhsa hriatuhpa mo pa (59) zy hneipa ta field sa (6), Khumi, Myo Khami, Myo, Laymyo, Asho nata Laytu field zy liata chakao haipa a châ. Atahmâ he

châbu ei vaw ro haino he Awnanopa sahlao maluh he 9571 ama châ.

He Mission chakaona raihria rônah ngaitapa he Mara Awnanopa ta kô (56) chhôn eima vaw hria pazao lymâ. Achhôn liata riethei rairuna hluhpi y hra sala, Mara Awnanopa mo to chhônhto thlahchhâna nata tiama papuana hmah a sie lymâ. Atahmâ cha foreign Mara nata râchhôn Mara Awnanopa sahlaozy tiamana chhao âpathu via lymâ hra. He mission chakaona raihria rônah ngâsâpa he Mara Awnanopa ta eima byhnâ tona chhaichhi rônah ngaitapa miakhâ ta a châ.

ABeipa Zisu ta 'khizaw khaihpa nama châ na, nama khaihna cha chyhsa mo hmô ta khaih se, chatanachata nama hmotao phapa taopa hmô aw ei ta, nama Paw a vâ liata a ypa ama palyupalih thei aw' miah a tahpa a châ.

## **REIPAHMAOHNA**

- 1) Thlahpa Pathaihpa pahrana hena Mission thapasana nata veina a vaw tlôkhei e tahpa châ ta, kheita eima tao khiahta e eimâ hra pazao lymâ thei aw?
- 2) Mara Awnanopa ta Mission chakaona châtaw mia (4) hnei ta, hlao patloh thei nawpa ta raihria chi pa (5) ta pachhaihpa ta Mission chakaona rai ahria haipa liana heta nâma hmônazie kheita e a y?
- 3) Hmah a sie na tah ma? Sie vei na tah ma? Na hmônazie rei awpa a châ.

**CHÂBU APAKYHPAZY**

1. Anderson, Gerald H. & Transky Thomas, ***Mission Trends No.1***, New York: Eerdmans Publiship Co. 1978
2. Blacman Cyril, ***The Biblical Basis of the Church's Missionary Enterprise***, London: London Missionary Society, 1961
3. Blauw, Johannes, ***The Missionary nature of the Church***, New York: Mc. Grew Hill Book Co. 1962
4. Boer, Harry, R., ***Pentecost and Missions***, Michigan: Wm. B. Eerdmans Publiship Co. 1975
5. Bosh, David J. ***Transforming Mission***, New York: Orbis Book, 1991
6. Costas, Orlando E., ***The Integrity of Mission***, San Francisco: Her per and Row Publishers, 1979
7. Couch, William T., ***Collier's Encyclopedia***, New York: P.F. Collier and Son Corporation, 1955
8. Fuller, Harld W., ***Mission Church Dynamics***, S. Pasadena: William Carey Library, 1981
9. Glasser, Arthur F. & Mc. Gavran, Donald A., ***Contemporary Theologies of Mission***, Michigan: Baker Book House, 1983
10. Glover, Robert H., ***The Bible Basis of Mission***, Chicago: Moody Press, 1978
11. Hedland, Roger, ***Mission to Man in the Bible***, Madras: Evangelical Literature Service, 1985

12. Kane, Herbert J., *The Christian World Mission Today and Tomorrow*, Michigan; Baker Book House, 1981
13. Morgan, Err, *The Mission of the Church*, Lodon: The Centenary Press, 1969
14. Senior, Donald & Stuhlmueeller, Carroll, *Biblical Foundations for mission*, New York: Orbis Books, 1991
15. Schottroff L. & Stegemann W., *Jesus and the Hope of the Poor*, New York: Orbis Books, 1988
16. Stott, John R. W. *Christian Mission in the Modern World*, Downe, Grove: Inter-Varsity Press, 1975

### BIEHRAI HMÂPAZY

1. Holy Bible, *Mara – R. V. (Reference)*
2. Holy Bible (RSV)
3. Holy Bible (CEV)
4. Everyday Mara Bible (F.C Vatha)